

四庫全書

史部

欽定四庫全書

史部
元史卷七十八

御史_臣徐訥覆勘

總校官編修臣朱
鈴

欽定四庫全書

元史卷七十七

明翰林學士亞中大夫和帝諸兼修國史宋濂等修

志第七十七下

祭祀

至正親祀南部

至正三年十月十七日親祀昊天上帝于圜丘以太祖

皇帝配享如舊儀制右丞相托克托為亞獻官太尉樞

密知院阿嚕圖為終獻官御史大夫巴咱爾為攝司徒
樞密知院旺嘉努為大禮使中書平章額森特穆爾特
穆爾達實二人為侍中御史大夫額森特穆爾中書右
丞太平二人為門下侍郎宣徽使達實特穆爾太常同
知李好文二人為禮儀使宣徽院使額森特穆爾執劈
正斧其餘侍祀官依等第定擬前期八月初七日太常
禮儀院移關禮部具呈都省會集翰林集賢禮部等官
講究典禮九月內承奉班都知孫玉鉉具錄親祀南郊

儀注云致齋日停奏刑殺文字應享執事官員泣誓於中書省享前一日質明所司備法駕儀仗暨侍享官分左右敘立於崇天門外太僕卿控御馬立於大明門外侍儀官導駕官各具公服備擎執立於致齋殿前通事舍人二員引門下侍郎侍中入殿相向立侍中跪奏請皇帝中嚴就拜興退出少頃引侍中跪奏外辦就拜興皇帝出致齋殿侍中跪奏請皇帝升輿侍儀官導駕官引擎執前導巡輦路至大明殿西陛下侍中跪奏請皇

帝降輿升殿就拜興皇帝入殿即御座舍人引執事等
官敘於殿午陛下相向立通班舍人贊起居引贊鞠躬
平身舍人引門下侍郎侍中入殿至御座前門下侍郎
侍中相向立侍中跪奏請皇帝降殿升輿就拜興侍儀
官前導至大明殿門外侍中跪奏請皇帝升輿就拜興
至大明門外侍中跪奏請皇帝降輿乘馬門下侍郎跪
奏請車駕進發就拜興動稱警蹕至崇天門外門下侍
郎跪奏請車駕少駐勅衆官上馬就拜興侍中承旨退

稱曰制可門下侍郎退傳制勅衆官上馬贊者承傳勅
衆官於櫺星門外上馬少頃門下侍郎跪奏請車駕進
發就拜興動稱警蹕華蓋繖扇儀仗百官左右前導教
坊樂鼓吹不作至郊壇南櫺星門外門下侍郎跪奏請
皇帝權停勅衆官下馬侍中傳制勅衆官下馬自卑而
尊與儀仗倒捲而北左右駐立駕至內櫺星門侍中跪
奏請皇帝降馬步入櫺星門由右偏門入稍西侍中跪
奏請皇帝升輿就拜興侍儀官導駕官引擎執前導至

大次殿門前侍中跪奏請皇帝降輿入就大次殿就拜
興皇帝入就大次簾降宿衛如式侍中入跪奏勅衆官
各退齋次就拜興通事舍人承旨勅衆官各還齋次尚
食進膳訖禮儀使以祝冊奏御署訖奉出郊祀令受而
奠於坫其享日丑時二刻侍儀官備擎執同導駕官列
於大次殿前通事舍人引侍中門下侍郎入大次殿侍
中跪奏請皇帝中嚴服袞冕就拜興退少頃舍人再拜
引侍中跪版奏外辦就拜興退出禮儀使入跪奏請皇

帝行禮就拜興簾捲出大次侍儀官備擎執同導駕官
前導皇帝至西墻門侍儀官導駕官擎執止於墻門外
近侍官代禮官皆後從入殿中監跪進大圭禮儀使跪
請皇帝執大圭皇帝入行禮禮節一如舊制行禮畢侍
儀官備擎執同導駕官前導皇帝還至大次通事舍人
引侍中入跪奏請皇帝解嚴釋袞冕停五刻頃尚食進
膳如儀所司備法駕儀仗同侍享等官分左右敘立於
郊南櫺星門外以北為上舍人引侍中入跪奏請皇帝

中嚴就拜興退少頃再引侍中跪版奏外辦就拜興皇
帝出大次侍中跪奏請皇帝升輿侍儀官備擎執同導
駕官前導至櫺星門外太僕卿進御馬侍中跪奏請皇
帝降輿乘馬就拜興門下侍郎跪奏請車駕進發就拜
興動稱警蹕至櫺星門外門下侍郎跪請皇帝少駐勅
衆官上馬就拜興侍中承旨退稱曰制可門下侍郎傳
制勅衆官上馬贊者承傳勅衆官上馬少頃門下侍郎
跪奏請車駕進發就拜興侍儀官備擎執同導駕官前

導動稱警蹕華蓋儀仗繖扇衆官左右前導教坊樂鼓吹皆作至麗正門裏石橋北舍人引門下侍郎下馬跪奏請皇帝權停勅衆官下馬贊者承傳勅衆官下馬舍人引衆官分左右先入紅門內倒轉而北駐立引甲馬軍士於麗正門內石橋大北駐立依次倒捲至櫺星門外左右相向立仗立於櫺星門內倒捲亦如之門下侍郎跪奏請車駕進發侍儀官備擎執導駕官導由崇天門入至大明門外引侍中跪奏請皇帝降馬升輿就拜

興至大明殿引衆官相向立於殿陛下俟皇帝入殿升座侍中跪奏請皇帝解嚴勅衆官皆退通事舍人承旨勅衆官皆退郊祀禮成

至正親祀太廟

至元六年六月監察御史呈嘗聞五行傳曰簡宗廟廢祭祀則水不潤下近年雨澤愆期四方多旱而歲減祀事變更成憲原其所致恐有感召欽惟國家四海乂安百有餘年列聖相承典禮具備莫不以孝治天下古者

宗廟四時之祭皆天子親享莫敢使有司攝也蓋天子之職莫大於禮禮莫大於孝孝莫大於祭世祖皇帝自新都城首建太廟可謂知所本矣春秋之法國君即位逾年改元必行告廟之禮伏自陛下即位以來于今七年未嘗躬詣太廟似為闕典方今政化更新並遵舊制告廟之典理宜親享時帝在上都臺臣以聞奉旨若曰俟到大都親祭九月二十七日中書省奏以十月初四日皇帝親祀太廟制曰可前期告示以太師右丞相滿

濟勒噶台為亞獻官樞密知院阿魯圖為終獻官知院
普爾普翰林承旨婁章為助奠官大司農阿雅噶齊為
七祀獻官侍中二人門下侍郎二人大禮使一人執劈
正斧一人禮儀使四人餘各如故事有司具儀注云享
前一日質明所司備法駕於崇天門外侍儀官引擎執
同導駕官具公服於致齋殿前左右分班侍立承奉舍
人引門下侍郎侍中入殿門下侍郎相向立侍中跪奏
臣某等官請皇帝中嚴就拜興退出少頃引侍中版奏

外辦就拜興退皇帝出齋室侍中跪奏請皇帝升輿巡
輦路由正門至大明殿西陛下侍中跪奏請皇帝降輿
升殿就拜興引皇帝即御座執事官於午陛下起居訖
舍人引侍中門下侍郎入殿至御榻前門下侍郎相向
立侍中跪奏請皇帝降殿升輿就拜興導至大明門外
侍中跪奏請皇帝升輿就拜興至大明門外太僕卿進
御馬侍中跪奏請皇帝降輿乘馬訖門下侍郎跪奏請
車駕進發就拜興進發時稱警蹕至崇天門外門下侍

郎跪奏請車駕少駐勅衆官上馬就拜興侍中承旨退
稱曰制可贊者承傳勅衆官上馬少頃門下侍郎跪奏
請車駕進發就拜興進發時稱警蹕導至太廟外紅門
內門下侍郎跪奏請車駕權停勅衆官下馬就拜興贊
者承傳勅衆官下馬門下侍郎跪奏請車駕進發至石
橋南侍中跪奏請皇帝下馬步入神門就拜興皇帝下
馬侍儀官同導駕官前導皇帝步入神門稍西侍中跪
奏請皇帝升輿就拜興至大次殿門前侍中跪奏請皇

帝降輿入就大次就拜興簾降宿衛如式侍中入跪奏
勅衆官各還齋次承旨贊者承傳勅衆官各還齋次俟
行禮時至丑時二刻頃侍儀官備擎執同導駕官於大
次殿門前舍人引侍中門下侍郎入大次座前侍中跪
奏請皇帝中嚴服袞冕就拜興退少頃再引侍中跪奏
外辦就拜興退禮儀使跪奏請皇帝行禮侍儀官同導
駕官導引皇帝至西神門擎執侍儀官同導駕官止行
禮畢皇帝由西神門出侍儀官備擎執同導駕官引導

皇帝還至大次舍人引侍中入跪奏請皇帝解嚴釋袞
冕尚食進膳如式畢侍中跪版奏外辦就拜興退導皇
帝出大次侍中跪奏請皇帝升輿就拜興侍儀官同導
駕官前導至神門外太僕卿進御馬侍中跪奏請皇帝
降輿乘馬就拜興乘馬訖門下侍郎跪奏請車駕進發
就拜興退進發時稱警蹕至櫺星門外門下侍郎跪奏
請車駕少駐勅衆官上馬就拜興侍中承旨退稱曰制
可贊者承傳勅衆官上馬少頃門下侍郎跪奏請車駕

進發就拜興進發時稱警蹕教坊樂振作至麗正門裏
石橋北引門下侍郎跪奏請車駕權停勅衆官下馬就
拜興贊者承傳勅衆官下馬門下侍郎跪奏請車駕進
發侍儀官引擎執同導駕官前導執事官後從皇帝由
紅門裏輦路至大明門外侍中跪奏請皇帝降馬乘輿
就拜興侍儀官擎執同導駕官導至大明殿諸執事殿
下相向立俟皇帝入殿升座侍中跪奏勅衆官皆退贊
者承傳勅衆官皆退

三皇廟祭祀禮樂

至正九年御史臺以江西湖東道肅政廉訪使文殊訥所言具呈中書其言曰三皇開天立極功被萬世京師每歲春秋祀事命太醫官主祭揆禮未稱請如國子學宣聖廟春秋釋奠上遣中書省臣代祀一切儀禮倣其制中書付禮部集禮官議之是年十月二十四日平章政事台哈布哈鼎珠等以聞制曰可遂命太常定儀式工部範祭器江浙行省製雅樂器復命太常博士定樂

曲名翰林國史院撰樂章十有六曲明年祭器樂器俱備以醫籍百四十有八戶克廟戶禮樂生御藥院大使盧亨素習音律受命教樂工四十有二人各執其技乃季秋九月九日歲事宣徽供禮饌光祿勳供內醞太府供金帛廣源庫供薤炬大興府尹供犧牲制幣染盛肴核中書奏擬三獻官以次定諸執事並以清望克前一日內降御香三獻官以下公服備大樂儀仗迎香至開天殿度置退習明日祭儀習畢就廟齋宿京朝文武百

司與祭官如之各以禮助祭翰林詞臣具祝文曰皇帝
敬遣某官某致祭

樂章

前卷祀社稷樂章俱在
禮樂類中今附于此

降神奏咸成之曲

黃鍾宮三成

於皇三聖 神化無方 繼天立極 垂憲百王

聿崇明祀 率由舊章 靈兮來下 休有烈光

降神奏賓成之曲

大吕角二成

帝德在人 日用不知 神之在天 矧可度思
辰良日吉 歲事有儀 感以至誠 尚右享之
降神奏顧成之曲

太簇徵二成

大道之行 肇自古先 功烈所加 何千萬年
是尊是奉 執事孔虔 神哉沛兮 洽風馭然
降神奏臨成之曲

應鍾羽二成

雅奏告成 神斯降格 晏安有位 清廟奕奕

肸蠁潛通 豐融烜赫 我其承之 百世無斁

初獻盥洗奏蠲成之曲

姑洗宮

靈旂戾止 式燕以寧 吉蠲致享 惟寅惟清

挹彼注茲 沃盥而升 有孚顙若 交于神明

初獻升殿奏恭成之曲

南呂宮

齋明盛服 恪恭命祀 洋洋在上 匪遠具邇
左右周旋 陟降庭止 式禮莫愆 用介多祉
奠幣奏祗成之曲

南呂宮

駿奔在列 品物咸備 禮嚴載見 式陳量幣
惟茲篚實 肅將誠意 靈兮安留 成我熙事

初獻降殿

與升殿同

捧俎奏闕成之曲

姑洗宮

我祀如何 有牲在滌 既全且潔 為俎孔碩

以將以享 其儀不忒 神其迪嘗 純嘏是錫

初獻盥洗

與前同

初獻升殿

與前同

太皞伏羲氏位酌獻奏

闕成之曲

南呂宮

五德之首 巍巍聖神 八卦有作 誕開我人

物無能稱 玄酒在尊 歆監在茲 惟德是親

炎帝神農氏位酌獻奏

闕成之曲

南呂宮

耒耜之利 人賴以生 鼓腹含哺 帝力難名

欲報之德 黍稷非馨 眷言顧之 享于克誠

黃帝有熊氏位酌獻奏

闕成之曲

南呂宮

為衣為裳 法乾效坤 三辰順序 萬國來賓

典祀有常 多儀具陳 純精罔達 匪藉彌文

配位酌獻奏闕成之曲

南呂宮

三聖儼臨 孰侑其食 惟爾有神 同功合德

丕擁靈休 留娛嘉席 歷世昭配 永永無極

初獻降殿與前同

亞獻奏闕成之曲終獻同

姑洗宮

緩節安歌 載升貳觴 禮成三終 申薦令芳

凡百有職 罔敢怠遑 神具醉止 欣欣樂康

徹豆奏闕成之曲

南呂宮

遵豆有踐 殷薦亶時 禮文疏洽 廢徹不遲

慎終如始 進退無違 神其祚我 綏以繁釐

送神奏闕成之曲

黃鍾宮

夜如何其 明星煌煌 靈逝弗留 飈舉雲翔

瞻望靡及 德音不忘 庶回景貺 發為禎祥

望瘞奏闕成之曲

姑洗宮

工祝致告 禮備樂終 加牲兼幣 訖蕝愈恭

精神斯罄 惠澤無窮 儲休錫美 萬福來崇

顏子考妣封謚

至順元年冬十一月望曲阜充國復聖公新廟落成元
統二年改封顏子考曲阜侯為杞國公謚文裕妣齊姜
氏為杞國夫人謚端獻夫人戴氏充國夫人謚貞素又
割益都鄒縣牧地三十頃徵其歲入以給常祀

宋五賢從祀

至正十九年十一月江浙行省據杭州路申備本路經
歷司呈准提控案牘鮑照磨承發架閣胡瑜牒嘗謂文
治興隆宜舉行於曠典儒先褒美期激勵於將來凡在

聞知詎容緘默蓋國家化民成俗莫先於學校而學校之設必崇先聖先師之祀者所以報功而示勸也我朝崇儒重道之意度越前古既已加封先聖大成之號又追崇宋儒周敦頤等封爵俾從祀廟庭報功示勸之道可謂至矣然有司討論未盡尚遺先儒楊時等五人未列從祀遂使盛明之世猶有闕典惟故宋龍圖閣直學士謚文靖龜山先生楊時親得程門道統之傳排王氏經義之謬南渡後朱張呂氏之學其源委脈絡皆出於

時者也故宋處士延平先生李侗傳河洛之學以授朱
熹凡集註所引師說即其講論之旨也故宋中書舍人
謚文定胡安國聞道伊洛志在春秋纂為集傳羽翼正
經明天理而扶世教有功於聖人之門者也故宋處士
贈太師榮國公謚文正九峯先生蔡沈從學朱子親承
指授著書集傳發明先儒之所未及深有功於聖經者
也故宋翰林學士叅知政事謚文忠西山先生真德秀
博學窮經踐履篤實當時立偽學之禁以錮善類德秀

晚出獨以斯文為己任講習躬行黨禁解而正學明此
五人者學問接道統之傳著述發儒先之秘其功甚大
況科舉取士已將胡安國春秋蔡沈尚書集傳表章而
尊用之真德秀大學衍義亦備經筵講讀是皆有補於
國家之治道者矣各人出處詳見宋史本傳俱應追錫
名爵從祀先聖廟廷可以敦厚儒風激勸後學如蒙備
呈上司申達朝省命禮官討論典禮如周敦頤等例聞
奏施行以補闕典吾道幸甚本省以其言具咨中書省

仍遣胡瑜赴都投呈至正二十一年七月中書判送禮部行移翰林集賢太常三院會議俱准所言回呈中書省二十二年八月奏准送禮部定擬五先生封爵謚號俱贈太師楊時追封吳國公李侗追封越國公胡安國追封楚國公蔡沈追封建國公真德秀追封福國公各給詞頭宣命遣官賫往福建行省訪問各人子孫給付如無子孫者於其故所居鄉里郡縣學或書院祠堂內安置施行

朱熹加封齊國父追謚獻靖

至正二十二年十二月追謚朱熹父為獻靖其制詞云
考德而論時灼見風儀之俊觀子而知父迨聞詩禮之
傳久閱幽堂丕昭公論故宋左承議郎守尚書吏部員
外郎兼史館校勘累贈通議大夫朱松仕不躁進德合
中行邈鄒魯之淵源式開來學開圖書之蘊奧妙契玄
機奏對雖忤於權姦嗣續篤生於賢哲化民成俗著書
滿家既繼志述事之光前何節惠易名之孔後才高弗

展嗟沈滯於下僚道大莫容竟昌明於永世神靈不昧
休命其承可謚獻靖其改封熹為齊國公制詞云聖賢
之蘊載諸經義理實明於先正風節之厲垂諸世褒崇
豈間於異時不有鉅儒孰膺寵數故宋華文閣待制累
贈寶謨閣直學士太師追封徽國公謚文朱熹挺生異
質早擢科名試用於郡縣而善政孔多迴翔於館閣而
直言無隱權姦屢挫志慮不回著書立言嘉乃簡編之
富愛君憂國負其經濟之長正學久達於中原渙號申

行於仁廟詢諸僉議宜易故封國啟營丘爰錫太公之
境土壤隣洙泗尚觀尼父之宮牆緬想英風載欽新命
可追封齊國公餘並如故

國俗舊禮

每歲太廟四祭用司禮監官一員名蒙古巫祝當省牲
時法服同三獻官升殿詣室戶告牖還至牲所以國語
呼累朝帝后名諱而告之明旦三獻禮畢獻官御史太
常卿博士復陞殿分詣各室蒙古博囉齊跪割牲太僕

卿以朱漆盃奉馬乳酌奠巫祝以國語告神訖太祝奉祝幣詣燎位獻官以下復版位載拜禮畢

每歲駕幸上都以八月二十四日祭祀謂之灑馬奶子用馬一羯羊八綵段練絹各九匹以白羊毛纏若穗者九貂鼠皮三命蒙古巫覡及蒙古漢人秀才達官四員領其事再拜告天又呼太祖青吉斯御名而祝之曰托天皇帝福蔭年年祭賽者禮畢掌祭官四員各以祭幣表裏一與之餘幣及祭物則凡與祭者共分之

每歲九月內及十二月十六日以後於燒飯院中用馬一羊三馬酒醴紅織金幣及裏絹各三匹命蒙古達官一員偕蒙古巫覡掘地為坎以燎肉仍以酒醴馬酒雜燒之巫覡以國語呼累朝御名而祭焉

每歲十二月下旬擇日於西鎮國寺內牆下灑掃平地太府兼供綵幣中尚監供細氈鍼線武備寺供弓箭環刀束稗草為人形一為狗一剪雜色綵段為之腸胃選達官世家之貴重者交射之非伯蘇扎拉爾柰曼孟古

岱拉拜塔坦沙卜珠蘇尼特等氏族不得與列射至糜
爛以羊酒祭之祭畢帝后及太子嬪妃併射者各解所
服衣俾蒙古巫覡祝讚之祝讚畢遂以與之名曰脫災
國俗謂之射草狗

每歲十二月十六日以後選日用白黑羊毛為線帝后
及太子自頂至手足皆用羊毛線纏繫之坐于寢殿蒙
古巫覡念呪語奉銀槽貯火置米糠于其中沃以酥油
以其煙薰帝之身斷所繫毛線納諸槽內又以紅帛長

數寸帝手裂碎之唾之者三併投火中即解所服衣帽
付巫覡謂之脫舊災迎新福云

凡后妃妊身將及月辰則移居于外氊帳房若生皇子
孫則錫百官以金銀綵段謂之色伯特及彌月復還內
寢其帳房則以頒賜近臣云

凡帝后有疾危殆度不可愈亦移居外氊帳房有不諱
則就殯殮其中葬後每日用羊二次燒飯以為祭至四
十九日而後已其帳房亦以賜近臣云

凡宮車晏駕棺用香楠木中分為二刻肖人形其廣狹長短僅足容身而已殮用貂皮襖皮帽其靴襪繫腰盒鉢俱用白粉皮為之殯以金壺瓶二盞一枕櫟匙筋各一殮訖用黃金為箍四條以束之輿車用白氈青緣納奇實為簾覆棺亦以納奇實為之前行用蒙古巫媼一人衣新衣騎馬牽馬一匹以黃金飾鞍轡籠以納奇實謂之金靈馬日三次用羊奠祭至所葬陵地其開穴所起之土成塊依次排列之棺既下復依次掩覆之其有

剌土則遠置他所送葬官三員居五里外日一次燒飯致祭三年然後返

世祖至元七年以帝師帕克斯巴言於大明殿御座上置白繖蓋一頂用素段泥金書梵字於其上謂鎮伏邪魔護安國剌自後每歲二月十五日於大殿啟建白繖蓋佛事用諸色儀仗社直迎引繖蓋周遊皇城內外云與衆生祓除不祥導迎福祉歲正月十五日宣政院同中書省奏請先期中書奉旨移文樞密院八衛撥繖鼓

手一百二十人殿後軍甲馬五百人擡舁監壇漢闕侯
神轎軍及雜用五百人宣政院所轄宮寺三百六十所
掌供應佛像壇面幢幡寶蓋車鼓頭旗三百六十壇每
壇擎執擡舁二十六人鉦鼓僧一十二人大都路掌供
各色金門大社一百二十隊教坊司雲和署掌大樂鼓
板杖鼓篳篥龍笛琵琶箏纂七色凡四百人興和署掌
妓女雜扮隊戲一百五十人祥和署掌雜把戲男女一
百五十人儀鳳司掌漢人回回河西三色細樂每色各

三隊凡三百二十四人凡執役者皆官給鎧甲袍服器仗俱以鮮麗整齊為尚珠玉金繡裝束奇巧首尾排列三十餘里都城士女閭閻聚觀禮部官點視諸色隊伍刑部官巡綽喧鬧樞密院官分守城門而中書省官一員總督視之先二日於西鎮國寺迎太子遊四門昇高塑像具儀仗入城十四日帝師率梵僧五百人於大明殿內建佛事至十五日恭請繖蓋于御座奉置寶輿諸儀衛隊伍列于殿前諸色社直暨諸壇面列于崇天門

外迎引出宮至慶壽寺具素食食罷起行從西宮門外
垣海子南岸入厚載紅門由東華門過延春門而西帝
及后妃公主於玉德殿門外搭金脊五殿綵樓而觀覽
焉及諸隊仗社直送金繖還宮復恭置御榻上帝師僧
衆作佛事至十六日罷散歲以為常謂之遊皇城或有
因事而輟尋復舉行夏六月中上京亦如之

元史卷七十七

元史卷七十七考證

祭祀志三皇廟祭祀樂章 案經世大典延祐中曾議
三皇廟樂章未果行此所載係順帝時所撰元典章
太常集禮經世大典皆無之永樂大典亦缺

欽定四庫全書

元史卷七十八

明翰林學士亞中大夫知制誥兼修國史宋濂等修

志第二十八

輿服一

若稽往古黃帝堯舜垂衣裳而天下治蓋取諸乾坤服
牛乘馬引重致遠蓋取諸大壯冕服車輿之制其來尚
矣虞書舜作十二章五服以命有德車服以賞有功禮

記虞轡車夏鉤車商大輅至周損益前代弁師掌王之
五冕巾車掌王之五輅而儀文始備然孔子論治天下
之大法於殷輅取其質而得中周冕取其文而得中也
至秦併天下兼收六國車旗服御窮極侈靡有大駕法
駕以及鹵簿漢承秦後多因其舊由唐及宋亦效秦法
以為盛典於文質適中之義君子或得而議焉元初立
國庶事草創冠服車輿並從舊俗世祖混一天下近取
金宋遠法漢唐至英宗親祀太廟復置鹵簿令攷之當

時上而天子之冕服皇太子冠服天子之濟遜天子之
五輅與腰輿象轎以及儀衛隊伏下而百官祭服朝服
與百官之濟遜以及於士庶人之服色粲然其有章秩
然其有序大抵參酌古今隨時損益兼存國制用備儀
丈於是朝廷之盛宗廟之美百官之富有以成一代之
制作矣作輿服志而儀衛附見于後云

冕服

天子冕服袞冕制以漆紗上覆曰緹青表朱裏緹之四

周匝以雲龍冠之口圍紫以珍珠紵之前後旒各十二以珍珠為之紵之左右繫黼纁二繫以玄紵承以玉瑱纁色黃絡以珠冠之周圍珠雲龍網結通翠柳調珠紵上橫天河帶一左右至地球鈿窠網結翠柳朱絲組二屬諸笄為纓絡以翠柳調珠簪以玉為之橫貫於冠

袞龍服制以青羅飾以生色銷金帝星一日一月一昇龍四複身龍四山三十八火四十八華蟲四十八虎雌四十八裳制以緋羅其狀如裙飾以文繡凡一十六

行每行藻二粉米一黼二黻二 中單制以白紗絳緣
黃勒帛副之 蔽膝制以緋羅有褱緋絹為裏其形如
褱袍上着之繡複身龍 玉珮珩一琚一瑀一衝牙一
璜二衝牙以繫璜珩下有銀獸面塗以黃金雙璜夾之
次又有衡下有衝牙傍別施雙的以鳴用玉 大帶制
以緋白二色羅合縫為之 玉環綬制以納奇實
金錦也 上有三小玉環下有青絲織網 紅羅韡制以紅羅為
之高勒 履制以納奇實有雙耳二帶絢飾以珠 襪

制以紅綾

右按太常集禮至元十二年十一月博士議擬冕天
版長一尺六寸廣八寸前高八寸五分後高九寸五
分身圍一尺八寸三分并納言用青羅為表紅羅為
裏周迴緣以黃金天版下四面珠網結子花素墜子
前後共二十有四旒以珍珠為之青碧線織天河帶
兩頭各有珍珠金翠旒三節玉滴子節花全紅線組
帶二上有珍珠金翠旒玉滴子下有金鐸二梅紅繡

欵慢帶一鞋續二珍珠垂繫上用金萼子二簪窠欵
慢組帶鈿窠各二內組帶窠四並鏤玉為之玉簪一
頂面鏤雲龍袞衣用青羅夾製五采間金繪日月星
辰山龍華蟲宗彝正面日一月一升龍四山十二上
下襟華蟲火各六對虎雉各四對背星一升龍四山
十二華蟲火各十二對虎雉各六對中單用白羅單
製羅領標襖裳一帶標襖全紅羅八幅夾造上繡藻
粉米黼黻藻三十二粉米十六黼三十二黻三十二

蔽膝一帶標襖紅羅夾造八幅上繡升龍二綬一幅
六采織造紅羅托裏小綬三色同大綬銷金黃羅綬
頭全上間施三玉環並碾雲龍緋白大帶一銷金黃
帶頭鈿窠二十有四紅羅勒帛一青羅抹帶一佩二
玉上中下璜各一半月各二並碾玉為雲龍文玉滴
子各二並珍珠穿造金篋鉤獸面水葉環釘全涼帶
一紅羅裏鏤金為之上為玉鶯七撻尾束各一金攀
龍口玳瑁襯釘寫一重底紅羅面白綾托裏如意頭

銷金黃羅緣口玉鼻純飾以珍珠金緋羅錦襪一兩
大德十一年九月博士議唐制天子袞冕垂白珠
十有二旒以組為纓色如其綬黹纁充耳玉簪導玄
衣繡裳凡十二章八章在衣日月星辰山龍華蟲火
宗彝四章在裳藻粉米黼黻標領為升龍皆織成之
龍章以下每章一行每行十二白紗中單黼領青標
襪裾黻加龍山火三章毳冕以上火山二章絺冕山
一章玄冕無章革帶大帶玉佩綬襪與上同舄加金

飾享廟謁廟及朝遣上將征還飲至踐阼加元服納
后元日受朝及臨軒冊拜王公則服之又宋制天子
服有袞冕廣尺二寸長二尺四寸前後十有二旒二
纁並貫珠又翠旒十二碧鳳銜之在珠旒外冕版以
龍鱗錦表上綴玉為七星傍施琥珀餅犀各二十四
周綴金絲網鈿以珍珠雜寶玉加紫雲白鶴錦裏四
柱飾以七寶紅綾裏金飾玉簪導紅絲條組帶亦謂
之平天冠袞服青色日月星山龍雉虎雖七章紅裙

藻火粉米黼黻五章紅蔽膝升龍二並織成間以雲
彩飾以金銀花鈿窠裝以珍珠琥珀雜寶玉紅羅襦
裙繡五章青標襪裾六采綬一小綬三結玉環三素
大帶朱裏青羅四紳帶二繡四紳盤結

綬帶飾並
同袞服

白

羅中單青羅抹帶紅羅勒帛鹿盧玉具釵玉鏤首鏤
白玉雙佩金飾貫珍珠金龍鳳草帶紅襪赤舄金釵
花四神玉鼻祭天地宗廟受冊尊號元日受朝冊皇
太子則服之事未果行至延祐七年七月英宗命禮

儀院使巴爾斯濟蘇傳旨令省臣與太常禮儀院速製法服八月中書省會集翰林集賢太常禮儀院官講議依秘書監所藏前代帝王袞冕法服圖本命有司製如其式

鎮圭制以玉長一尺二寸有袋副之

皇太子冠服 袞冕 玄衣 纁裳 中單 蔽膝

玉佩 大綬 朱襪 赤舄

按太常集禮至元十二年博士擬袞冕制用白珠九

旒紅絲組為纓青纁充耳犀簪導青衣朱裳九章五
章在衣山龍華蟲火宗彝四章在裳藻粉米黼黻白
紗中單青襖襪裾革帶塗金銀鉤釵蔽膝隨裳色為
火山二章瑜玉雙佩四采織成大綬間施玉環三白
襪朱舄舄加金塗銀釦大德十一年九月照擬前代
制度唐制皇太子袞冕垂白珠九旒紅絲組為纓青
纁充耳犀簪導玄衣繡裳九章五章在衣龍山華蟲
火宗彝四章在裳藻粉米黼黻織成之每行一章黼

蔽重以為等每行九白紗中單黼領青標襪裾草帶
金鈎黼大帶蔽膝隨裳色火山二章玉具釵金寶飾
玉鏢首瑜玉雙佩朱組雙大綬四采赤白縹紺純朱
質長丈八尺首廣九寸小雙綬長二尺六寸色同大
綬而首半之間施玉環三朱襪赤舄加金飾侍從祭
祀及謁廟加元服納妃服之宋制皇太子袞冕垂白
珠九旒紅絲組為纓青纁充耳犀簪導青衣朱裳九
章五章在衣山龍華蟲火宗彝四章在裳藻粉米黼

黻白紗中單青襖襪裙革帶塗金銀鈎髀蔽膝隨裳
色火山二章瑜玉雙佩四采織成大綬間施玉環二
白襪朱舄舄加塗金銀飾加元服從祀受冊謁廟朝
會服之已擬其制未果造

三獻官及司徒大禮使祭服 籠巾貂蟬冠五青羅服

五領袖襖俱用皂綾紅羅裙五皂綾為襖紅羅蔽膝五其羅花樣俱係牡丹白

紗中單五黃綾帶紅組金綬紳五紅組金譯語言納奇實各佩玉環二象笏

五銀束帶五玉佩五白羅方心曲領五赤草履五對白

綬襪五對

助奠以下諸執事官冠服

貂蟬冠獬豸冠七梁冠六

梁冠五梁冠四梁冠三梁冠二梁冠二百青羅服二百

領袖襪俱用皂綾

紅綾裙二百

皂綾為襪

紅羅蔽膝二百紫羅公服

二百

用梅花羅

白紗中單二百

黃綾帶

織金綬紳二百

紅一百九十八

青二各佩銅環二

銅束帶二百白羅方心曲領二百銅佩二百

展角幘頭二百塗金荔枝帶三十烏角帶一百七十皂

鞞二百對赤革履二百對白綾襪二百對象笏三十銀

杏木笏一百七十

凡獻官諸執事行禮俱衣法服惟監察御史二冠獬豸服青綬凡迎香讀祝及祀日遇陰雨俱衣紫羅公服六品以下皆得借紫

都監庫祠祭局儀鸞局神厨局頭目長行人等 交角幘頭五十窄袖紫羅服五十塗金束帶五十皂鞢五十對

初憲宗壬子年秋八月祭天於日月山用冕服自此始

成宗大德六年春三月祭天於麗正門外丙地命獻
官以下諸執事各具公服行禮是時大都未有郊壇
大禮用公服自此始九年冬至祭享用冠服依宗廟
見用者製其後節次祭祀或合祀天地增配位從祀
獻攝職事續置冠服於法服庫收掌法服二百九十
有九公服二百八十窄紫二百九十有五至大間大
常博士李之紹王天祐疏陳親祀冕無旒服大裘而
加袞裘以黑羔皮為之臣下從祀冠服歷代所尚其

制不同集議得依宗廟見用冠服制度

社稷祭服 青羅袍一百二十三白紗中單一百二十

三紅梅花羅裙一百二十三藍織錦銅環綬紳二紅織

錦銅環綬紳一百一十七紅織錦玉環綬紳四紅梅花

羅蔽膝一百二十三草履一百二十三白綾襪一百二

十三白羅方心曲領一百二十三黃綾帶一百二十三

佩一百二十三銅珩璜者一百一十九玉珩璜者四藍

素紵絲帶一百二十三銀帶四銅帶一百一十九冠一

百二十三水角簪金梁冠一百七紗冠一十獅鬚冠二
籠巾紗冠四木笏一百二十三紫羅公服一百二十三
黑漆幘頭一百二十三展角全二色羅插領一百二十
三鍍金銅荔枝帶一十角帶一百一十三象笏一十三
枝木笏一百一十枝黃絹單包複一百二十三紫紵絲
抹口青氍毹一百一十三皂鞞一百二十三窄紫羅衫
三十黑漆幘頭三十銅束帶三十黃絹單包複三十皂
鞞三十紫紵絲抹口青氍毹三十

宣聖廟祭服 獻官法服 七梁冠三全鵝青袍三絨

錦綬紳三

各帶青絨綢并銅環二

方心曲領三藍結帶三銅佩三

紅羅裙三白絹中單三紅羅蔽膝三革履三

白絹襪全

執

事儒服 軟角唐巾白襴插領黃鞢角帶皂鞢各九十

有八 曲阜祭服 連蟬冠四十有三七梁冠三五梁

冠三十有六三梁冠四皂紵絲鞋三十有六鞞舒角幘

頭二軟角唐巾四十角簪四十有三冠纓四十有三副

凡八十有六條

象牙笏七木笏三十有八玉佩七

凡十有四繫

銅佩

三十有六

北七十有二繫

帶八十有五藍鞵帶七紅鞵帶三十

有六鳥角帶二黃鞵帶鳥角偏帶四十大紅金綬結帶

七

上用玉環十有四

青羅大袖夾衣七紫羅公服二褐羅大袖

衣三十有六白羅衫四十白絹中單三十有六白紗中

單七大紅羅夾蔽膝七大紅夾裳緋紅羅夾蔽膝三十

有六緋紅夾裳四黃羅夾裳三十有六黃羅大帶七白

羅方心曲領七紅羅綬帶七黃絹大帶三十有六皂鞵

白羊毳襪各四十有二對大紅羅鞋七鞞白絹夾襪四

十有三輛 濟遜漢言一色服也內庭大宴則服之冬

夏之服不同然無定制凡勲戚大臣近侍賜則服之下

至樂工衛士皆有其服精粗上下制雖有別總謂之濟

遜云 天子濟遜冬之服凡十有一等服納其實

金錦也

克默里爾克

前耳也

則冠金錦暖帽服大紅桃紅紫藍綠

布哩頁蘇

布哩頁蘇服之有欄者也

則冠七寶重頂冠服紅黃粉皮

則冠紅金褡子暖帽服白粉皮則冠白金褡子暖帽服

銀鼠則冠銀鼠暖帽其上並加銀鼠比肩

俗稱曰襟子連呼

夏

之服凡十有五等服塔納圖納奇實

綴大珠於金錦

則冠寶頂

金鳳鉞笠服蘇布特圖納奇實

綴小珠於金錦

則冠珠子捲雲

冠服納奇實則帽亦如之服大紅珠布哩頁蘇紅毛子

塔納則冠珠緣邊鉞笠服白毛子金絲布哩頁蘇則冠

白藤寶貝帽服馳褐毛子則帽亦如之服大紅綠藍銀

褐素褐金繡龍五色羅則冠金鳳頂笠各隨其服之色

服金龍青羅則冠金鳳頂漆紗冠服珠子褐七寶珠龍

褙子則冠黃雅庫特寶貝珠子帶後簷帽服青蘇普金

絲襪子

蘇普回回毛布之精者也

則冠七寶漆沙帶後簷帽

百官

濟遜冬之服凡九等大紅納奇實一大紅克默爾長克
一大紅官素一桃紅藍綠官素各一紫黃鵝青一夏之
服凡十有四等素納奇實一聚線布哩頁蘇納奇實一
棗褐渾金絲蛤珠一大紅官素帶布哩頁蘇一大紅明
珠襖子一桃紅藍綠銀褐各一高麗鵝青雲袖羅一駝
褐茜紅白毛子各一鵝青官素服布哩頁蘇一

百官公服 公服制以羅大袖盤領俱右袪一品紫大

獨科花徑五寸二品小獨科花徑三寸三品散荅花徑
二寸無枝葉四品五品小雜花徑一寸五分六品七品
緋羅小雜花徑一寸八品九品綠羅無丈 幘頭漆紗
為之展其角 笏制以牙上圓下方或以銀杏木為之
偏帶正從一品以玉或花或素二品以花犀三品四
品以黃金為荔枝五品以下以烏犀並八胯鞋用朱革
鞞以皂皮為之

儀衛服色 交角幘頭其制中後交折其角 鳳翅幘

頭制如唐巾兩角上曲而作雲頭兩傍覆以兩金鳳翅

學士帽制如唐巾兩角如匙頭下垂 唐巾制如幘

頭而攢其角兩角上曲作雲頭 控鶴幘頭制如交角

金縷其額 花角幘頭制如控鶴幘頭兩角及額上簇

象生雜花 錦帽制以漆紗後幅兩旁前拱而高中下

後畫連錢錦前額作聚文 平巾幘黑漆革為之形如

進賢冠之籠巾或以青或以白 武弁制以皮加漆

甲騎冠制以皮加黑漆雌黃為緣 抹額制以緋羅繡

寶花 巾制以絀五色畫寶相花 兜鍪制以皮金塗

五色各隨其甲 襯甲制如雲肩青錦質緣以白錦裏

以氈裏以白絹 雲肩制如四垂雲青緣黃羅五色嵌

金為之 裱襠制如衫 襯袍制用緋錦武士所以楊

裱襠 士卒袍制以絹絀繪寶相花 窄袖袍制以羅

或絀 辦線襖制如窄袖衫腰作辦線細摺 控鶴襖

制以青緋二色錦圓荅寶相花 窄袖襖長行輿士所

服紺緞色 樂工襖制以緋錦明珠琵琶窄袖辦線細

摺 甲覆膊掩心扞背扞股制以皮或為虎文獅子文
或施金鎧鎖子文 臂鞬制以錦綠絹為裏有雙帶
錦縵蛇束麻長一大一尺裏以紅錦 束帶紅鞵雙獺
尾黃金塗銅胯餘同腰帶而狹小 條環制以銅黃金
塗之 汗胯制以青錦緣以銀褐錦或繡撲獸間以雲
氣 行縵以絹為之 鞋制以麻 鞵鞋制以皮為履
而長其鞵縛于行縵之內 雲頭鞵制以皮幫嵌雲朵
頭作雲象鞵束于脛

服色等第仁宗延祐元年冬十有二月定服色等第詔
曰比年以來所在士民靡麗相尚尊卑混淆僭禮費財
朕所不取貴賤有章益明國制儉奢中節可阜民財命
中書省定立服色等第于后 一蒙古人不在禁限及
見當集賽諸色人等亦不在禁限惟不許服龍鳳文

龍謂

五爪二角者

一職官除龍鳳文外一品二品服渾金花三

品服金襴子四品五品服雲袖帶欄六品七品服六花

八品九品服四花

職事散官從一高

繫腰五品以下許用銀并

減鐵 一命婦衣服一品至三品服渾金四品五品服

金褡子六品以下惟服銷金並金紗褡子首飾一品至

三品許用金珠寶玉四品五品用金玉珍珠六品以下

用金惟耳環用珠玉

同籍不限親疎期親
雖別籍并出嫁同

一器皿

謂
茶

酒
器 除鍛造龍鳳文不得使用外一品至三品許用金玉

四品五品惟臺盞用金六品以下臺盞用鍍金餘並用

銀 一帳幕除不得用赭黃龍鳳文外一品至三品許

用金花刺繡紗羅四品五品用刺繡紗羅六品以下用

素紗羅 一車輿除不得用龍鳳文外一品至三品許用間金粧飾銀螭頭繡帶青幔四品五品用素獅頭繡帶青幔六品至九品用素雲頭素帶青幔 一鞍轡一品許飾以金玉二品三品飾以金四品五品飾以銀六品以下並飾以鍮石銅鐵 一内外有出身考滿應入流見役人員服用與九品同 一授各投下令旨鈞旨有印信見任勾當人員亦與九品同 一庶人除不得服赭黃惟許服暗花紵絲紉綾羅毛毳帽笠不許飾用

金玉韉不得裁制花樣首飾許用翠花並金釵鐸各一事惟耳環用金珠碧甸餘並用銀酒器許用銀壺瓶臺盞盂鍤餘並禁止帳幕用紗絹不得赭黃車輿黑油齊頭平頂皂幔 一諸色目人除行營帳外其餘並與庶人同 一諸職官致仕與見任同解降者依應得品級不叙者與庶人同 一父祖有官既沒年深非犯除名不叙之限其命婦及子孫與見任同 一諸樂藝人等服用與庶人同凡承應粧扮之物不拘上例 一皂隸

公使人惟許服紬絹 一娼家出入止服皂褙子不得
乘坐車馬餘依舊例 一今後漢人高麗南人等投充
集賽者並在禁限 一服色等第上得兼下下不得僭
上違者職官解見任期年後降一等叙餘人決五十七
下違禁之物付告捉人充賞有司禁治不嚴從監察御
史廉訪司究治 御賜之物不在禁限

輿輅

玉輅青質金裝青絲藻井栲栳輪蓋外施金裝雕木雲

龍內盤碾玉福海圓龍一項上匝以金塗鍮石耀葉八
十一上圍九者二中圍九者三下圍九者四頂輪衣三
重上二重青繡雲龍瑞草下一重無文輪衣內黃屋一
黃素紵絲漉水下周垂朱絲結網青紵絲繡小帶四十
八帶頭綴金塗小銅鈴青紵絲繡絡帶二頂輪平素面
夾用青紵絲蓋四周垂流蘇八飾以五色茸線結網五
重金塗銅鈸五金塗木珠二十有五又繫玉雜佩五珩
璜衝瑤全金塗鍮石鈎掛十六黃茸貫頂天心直下十

字繩二各長三丈蓋下立朱漆柱四柱下直平盤虛櫃
中樞三十下外枕二漆繪犀象鸚鵡錦雉孔雀隔窠嵌
裝花板櫃周朱漆勾闌雲拱地霞葉百七十有九下垂
牙護泥虛板并朱漆畫瑞草勾闌上玉行龍十碾玉蹲
龍十孔雀羽臺九水精面火珠七金圈焰銅照八輿下
周垂朱絲結網飾以金塗鍮石鐸三百綵畫鍮石梅萼
嵌網眼中輿之長轅三界轅勾心各三上下龍頭六前
轅引手玉螭頭三並繫以蹲龍後轅方轆頭三枕頭十

六綰以蹲龍三轅頭衡一兩端玉龍頭二上列金塗銅鳳十二含以金塗銅鈴輿之軸一輪二軸之掌羅二明輅蹲龍綰並青漆輪之輻各二十四轂首壓貼金塗銅轂葉八十一金塗鍮石擎耳戀攀四櫃之前朱漆金裝雲龍輅牌一牌字以玉裝綴輅之箱四壁雕鍍漆畫填心隔窠龜文華版上層左畫青龍右畫白虎前畫朱雀後畫玄武輅之前額玉行龍二奉一水精珠後額如之前兩柱青茸鈴索五貼金鸞和大饗銅鈴十金塗鍮石

雙魚五下朱漆軾櫃一櫃上金香球金香寶金香合銀
灰盤各一並黃絲綬帶轆之後朱漆後轎一金塗曲戍
黃紵絲銷金雲龍門簾一緋紵絲繡雲龍帶二轆之中
金塗銷石較碾玉龍椅一靠背上金塗圈焰玉明珠一
左建大常旂十有二旂青羅繡日月五星升龍右建闌
戟一九旂青羅繡雲龍中央黃羅繡青黑黼文兩旗綢
杠並青羅旗首金塗鍮石龍頭二金塗銅鈴二金塗鍮
石鈸青纓綾十二重金塗木珠流蘇十二重龍椅上方

坐一綠褥一皆錦銷金黃羅夾帕一方輿地褥二勾闌
內褥八皆用雜錦綺青漆金塗鍮石絞葉踏道一小褥
五重青漆雕木塗金龍頭行馬一小青漆梯一青漆柄
金塗長托叉二短托叉二金塗首青漆推竿一青茸引
轆索二各長六丈餘金塗銅環二黃絨綏一轆馬誕馬
並青色鞍轡鞦勒纓拂鞞並青韋金飾誕馬青織金紵
絲屨四青羅銷金絹裏籠鞍六蓋轆黃絹大蒙帕一黃
油絹帕一駕士平巾大袖並青繪紵絲為之

至治元年英宗親祀太廟詔中書及太常禮儀院禮部定擬制鹵簿五輅以平章政事張瑄留守王伯勝將作院使明埒棟阿侍儀使伊喇圖們董其事是年玉輅成明年親祀御之後復命造四輅未成而罷

金輅赤質金粧青綠藻井栲栳輪蓋外施金粧雕木雲龍內盤真金福海圓龍一頂上匝以金塗鍮石耀葉八十一上圍九者二中國九者三下圍九者四頂輪衣三重上二重大紅繡雲龍瑞草下一重無文輪衣內黃屋

一黃素紵絲漚水下垂朱絲結網一周大紅紵絲繡小帶四十八帶頭綴金塗小銅鈴三百大紅紵絲繡絡帶二頂輪平素面夾用緋紵絲蓋之四周垂流蘇八飾以五色茸線結網五重金塗鑰石雜佩八珩璜衝璫全金塗鑰石鈎掛十有六黃絨貫頂天心直下十字繩二蓋下立朱漆柱四柱下直平盤虛櫃中櫺三十其下外枕二漆繪犀象鸚鵡錦雉孔雀隔窠嵌粧花板櫃上周遭朱漆勾闌雲拱地霞葉一百七十有九下垂牙護泥虛

板並朱漆畫瑞草勾闌上金塗鍮石行龍十二金塗鍮石蹲龍十孔雀羽臺九水精面火珠七金圈焰銅照八與下垂朱絲結網一遭飾以金塗鍮石鐸子三百綵畫鍮石梅萼嵌網眼中與之長轆三界轆勾心各三上下龍頭六前轆引手金塗鍮石螭頭三並繫以蹲龍後轆方轆頭三枕頭十六繫以蹲龍三轆頭衡一兩端金塗鍮石龍頭二上列金塗龍鳳十二含以金塗銅鈴與之軸一輪二軸之掌羅二明轆蹲龍綵並漆以赤輪之輻

各二十有四數首壓貼金塗銅數葉八十有一金塗鑰
石擎耳戀攀四櫃之前朱漆金粧雲龍輅牌一金塗鐵
曲戍輅之箱四壁雕鏤漆畫填心隔窠龜文花板上層
左畫青龍右畫白虎前畫朱雀後畫玄武輅之前額金
行龍二奉一水精珠後額亦如之前兩柱緋絨鈴索五
貼金鸞和大響銅鈴十金塗鑰石雙魚五下朱漆軾櫃
一櫃上金香毬一金香寶一金香合銀灰盤一並黃紵
絲綬帶輅之後朱漆後轡一金塗曲戍黃紵絲銷金雲

龍門簾一緋紵絲繡雲龍帶二輅之中黃粧銅鈹龍椅
一靠背上金塗園焰玉明珠一左建大常旂十有二旂
緋羅繡日月五星升龍右建闕戟一九旂緋羅繡雲龍
中央黃羅繡青黑黼文兩旗綢杠並大紅羅旗首金塗
鍮石龍頭二金塗銅鈴二金塗鍮石鈹朱纓綾十二重
金塗木朱沅蘇十二重龍椅上金錦方坐子一綠喀提
金錦也 褥一銷金黃羅夾帕一方輿地金錦褥一綠喀提
褥一勾闊內喀提條褥四藍紵絲條褥四朱漆金塗鍮

石鈇葉踏道一小喀提條褥五重朱漆雕木塗金龍頭
行馬一小朱漆梯一朱漆柄金塗長托叉二短托叉二
金塗首朱漆推竿一紅絨引轆索二金塗銅環二黃絨
執綏一轆馬誕馬並赤色鞍轡鞦勒纓拂套項並赤韋
金粧誕馬紅織金紵絲履四副紅羅銷金紅絹裏籠鞍
六蓋轆黃絹大蒙帕一黃油絹帕一駕士平巾大袖並
緋繡紵絲為之

象轆黃質金粧青綠藻井栲栳輪蓋外施金裝雕木雲

龍內盤描金象牙雕福海圓龍一頂上匝以金塗鑰石
耀葉八十有一上圍九者二中圍九者三下圍九者四
頂輪衣三重上二重黃繡雲龍瑞草下二重無文輪衣
內黃屋一黃素紵絲漚水下垂朱絲結網一遭黃紵絲
繡小帶四十有八帶頭綴金塗小銅鈴三百黃紵絲繡
輅帶二頂輪平素面夾用黃紵絲蓋之四周垂流蘇八
飾以五色茸線結網五重金塗銅鈸五金塗木珠二十
有五又繫金塗鑰石雜佩八珩璜衝瑤全金塗鑰石鈎

掛十有六黃絨貫頂天心直下四字繩二蓋下立朱漆
柱四柱下直平盤虛櫃中樞三十下外枕二漆繪犀象
鸚鵡錦雉孔雀隔窠嵌粧花板櫃上周遭朱漆勾闌雲
拱地霞葉百七十有九下垂牙護泥虛板並朱漆畫瑞
草勾闌上描金象牙雕行龍十蹲龍十孔雀羽臺九水
晶面大珠七金圈焰銅照八輿下垂朱絲結網一遭飾
以金塗鎡石鐸子三百采畫鎡石梅萼嵌網眼中輿之
長轅三界轅勾心各三上下龍頭六前轅引手描金象

牙雕螭頭三并繫以蹲龍後轆方轆頭三枕頭十有六
繫以蹲龍三轆頭衡一兩端描金象牙雕龍頭二十列
金塗銅鳳十二舍以金塗銅鈴與之軸一輪二軸之掌
羅二明轆蹲龍絃並漆以黃輪之輻各二十有四轂首
壓貼金塗龍轂葉八十有一金塗鍤石擎耳戀攀四櫃
之前金漆金粧雲龍轆牌一金塗鐵曲戍轆之箱四傍
雕鏤漆畫瑱心隔窠龜文花板上層左畫青龍右畫白
虎前畫朱雀後畫玄武轆之前額描金象牙雕行龍二

奉一水精珠後額如之前額柱黃絨鈴索五貼金鸞和
大響銅鈴十金塗鍤石雙魚五下朱漆軾櫃一櫃上金
香毬一金香寶一金香合一銀灰盤一並黃紵絲綬帶
輅之後朱漆後轡一金塗曲戍黃紵絲銷金雲龍門簾
一緋紵絲繡雲龍帶二輅之中黃金粧鉸描金象牙雕
龍椅一靠背上金塗圈焰玉明珠一左建太常旂一十
有二旂黃羅繡日月五星升龍右建闌戟一九旂黃羅
繡雲龍中央黃羅繡青黑黼文兩旗網杠並黃羅旗首

金塗鍤石龍頭二金塗銅鈴二金塗鍤石鉞黃纓綾十
二重金塗木珠沅蘇十二重龍椅上金錦方生一綠喀
提褥一勾關內喀提條褥四藍紵絲條褥四黃漆金塗
鍤石鉞葉踏道一小喀提條褥五重黃漆木塗金龍頭
行馬一小黃漆梯一黃漆柄金塗長托叉二短托叉二
金塗首黃漆推竿一黃絨引轆索一金塗銅環二黃絨
執綏一轆馬誕馬皆黃色鞍轡鞦勒纓拂套項並金粧
黃韋誕馬銀褐織金紵絲屨四副黃羅銷金黃絹裏籠

鞍六蓋輅黃絹大蒙帕一黃油絹帕一駕士平巾大袖
並黃繡紵絲為之

革輅紵絲金粧青綠藻井栲栳輪蓋外施金粧雕木雲
龍內盤描金白檀雕福圓海龍一頂上匝以金塗鍮石
耀葉八十有一上圍九者二中圍九者三下圍九者四
頂輪衣三重上二重素白繡雲龍瑞草下一重無文輪
衣內黃屋一黃素地紵絲漉水下垂朱絲結網一遭素
白紵絲繡小帶四十有八帶頭綴金塗小銅鈴三百素

白紵絲繡絡帶二頂輪平素面夾用白素紵絲蓋之四
周垂流蘇八飾以五色絨線結網五重金塗銅鈸五金
塗木珠二十有五又繫金塗鍮石雜佩八衍璜衝珥全
金塗鍮石鈎掛十有六黃絨貫頂天心直下十字繩二
蓋下立朱漆柱四柱下直平盤虛櫃中櫃三十下外枕
二漆繪革鞞犀象鸚武錦雉孔雀隔窠嵌粧花板櫃上
周遭朱漆勾闌雲拱地震葉百七十有九下垂牙護泥
虛板並朱漆畫瑞草勾闌上描金白檀行龍十擺白蹲

龍十孔雀羽臺九水精面火珠七金圈焰銅照八輿下
垂朱絲結網一遭飾以金塗鍮石鐸子三百絲畫鍮石
梅萼嵌網眼中與之長轆三界轆勾心各三上下龍頭
六前轆引手擺白螭頭三並繫以蹲龍後轆方罨頭三
枕頭十有六繫以蹲龍三轆頭衡一兩端擺白龍頭二
上列金塗銅鳳十二含以金塗銅鈴與之軸一輪二軸
之掌羅二明轆蹲龍絃皆漆以白其輪之輻各二十有
四轂首壓貼金塗銅轂葉八十有一金塗鍮石擎耳總

攀四櫃之前朱漆金粧雲龍輅牌一金塗鐵曲戍輅箱
之四傍雕鏤革鞞漆畫填心隔窠龜文花板上層左畫
青龍右畫白虎前畫朱雀後畫白武輅之前額白檀行
龍二奉一水精珠後額如之前兩柱素白絨鈴索五貼
金鸞和大響銅鈴十金塗鍤石雙魚五下朱漆革鞞軾
櫃一櫃上金香毬一金香寶一金香合一銀灰盤一皆
黃紵絲綬帶輅之後朱漆革鞞後轡一金塗曲戍黃紵
絲銷金雲龍門簾一緋紵絲繡雲龍帶二輅之中金粧

鉞白檀雕龍椅一靠背上金塗圈焰玉明珠一左建太
常旂一十有二旂白羅繡日月五星升龍右建闌戟一
九旂素白羅繡雲龍中央黃羅繡青黑黼文兩旗綢杠
並素白羅旗首金塗鍮石龍頭二金塗銅鈴二金塗鍮
石鉞素白鸚鵡十有二重金塗木珠流蘇十有二重龍
椅上金錦方座一綠喀提褥一鋪金黃羅夾帕一方輿
地金錦褥一綠喀提褥一勾闌內喀提條褥五重素白
漆雕木塗金龍頭行馬一小白漆梯一白漆柄金塗長

托叉二短托叉二金塗首白漆推竿一白絨引轆索二
金塗銅環二黃絨執綏一轆馬誕馬皆白色鞍轡鞦勒
纓拂套項皆白韋金粧誕馬白織金紵絲履四副白羅
銷金白絹裏籠鞍六蓋轆黃絹大蒙帕一黃油絹帕一
駕士平巾大袖皆白繡紵絲為之

木轆黑質金粧青綠藻井栲栳輪蓋外施金粧雕木雲
龍內盤描金紫檀雕福海圓龍一頂上匝以金塗鍮石
耀葉八十有一上圍九者二中圍九者三下圍九者四

頂輪衣三重上二重皂繡雲龍瑞草下一重無文輪衣
內黃屋一黃素紵絲漉水下垂朱絲結網一遭皂紵絲
繡小帶四十有八帶頭綴金塗小銅鈴三百皂紵絲繡
絡帶二頂輪平素面夾用檀褐紵絲蓋之四周垂流蘇
八飾以五色絨線結網五重金塗銅鈇五金塗木珠二
十五又繫金塗鍤石雜佩八珩璜衝瑀全金塗鍤石掛
鈎十有六黃絨貫頂天心直下十字繩二蓋下立朱漆
柱四柱下直平盤虛櫺中樞三十下外枕二漆繪犀象

鸚鵡錦雉孔雀隔窠嵌粧花板櫃上周遭朱漆勾闌雲
拱地霞葉百七十有九下垂牙護泥虛板皆朱漆畫瑞
草勾闌上金嵌鎖鐵行龍十蹲龍十孔雀羽臺九水精
面火珠七金圈焰銅照八輿下垂朱絲結網一遭飾以
金塗鍮石鐸子三百綵畫鍮石梅萼嵌網眼中輿之長
轅三界轅勾心各三上下龍頭六前轅引手金嵌鎖鐵
螭頭三皆綵以蹲龍後轅方卷頭三枕頭十有六繫以
蹲龍三轅頭銜一兩端金嵌鎖鐵龍頭二上列金塗銅

鳳十二含以金塗銅鈴與之軸一輪二軸之掌羅二明
轄蹲龍絃並漆以黑輪之輻各二十有四轂首壓貼金
塗銅轂葉八十有一金塗鍮石擎耳總攀四櫃之前朱
漆金粧雲龍輅牌一金塗鐵曲戍輅之箱四傍雕鍍漆
畫填心隔窠龜文花板上層左畫青龍右畫白虎前畫
朱雀後畫玄武輅之前額金嵌鎖鐵行龍二奉一水精
珠後額如之前兩柱皂絨鈴索五貼金鸞和火響銅鈴
十金塗鍮石雙魚五下朱漆軾櫃一櫃上金香毬一金

香寶一金香合一銀灰盤一皆黃紵絲綬帶輅之後朱
漆後輶一金塗曲戍黃紵絲銷金雲龍門簾一緋紵絲
繡雲龍帶二輅之中金粧烏木雕龍椅一靠背上金塗
圈焰玉明珠一左建太常旂一十有二旂皂羅繡日月
五星升龍右建閭戟一九旂皂羅繡雲龍中央黃羅繡
青黑黼文兩旗綢杠並皂羅旗首金塗鍮石鈹紫纓綵
十有二重金塗流蘇十有二重龍椅上金錦方坐一綠
喀提褥一銷金黃羅夾帕一方輿地金錦褥一綠喀提

褥一勾闌內客提條褥四藍紵絲條褥四黑漆金塗鋪
石鉸葉踏道一小喀提條褥五重黑漆雕木塗金龍頭
行馬一小黑漆梯一黑漆柄金塗長托叉二短托叉二
金塗首黑漆推竿一皂絨引轆索二金塗銅鐐二黃絨
執綏一轆馬誕馬並黑色鞍轡鞦勒纓拂套項皆以淺
黑韋金粧誕馬紫織金紵絲履四副紫羅銷金紫絹裏
籠鞍六蓋轆黃絹大蒙帕一黃油絹帕一駕士平巾大
袖紫繡紵絲為之

腰輿制以香木後背作山字牙嵌七寶粧雲龍屏風上
施金圈焰明珠兩傍引手屏風下施雕鏤雲龍床生前
有踏床客提錦褥一坐上貂鼠緣金錦條褥綠客提方

半

象轎

象凡

巡幸則御之

元史卷七十八

元史卷七十八考證

袞冕長二尺四寸 原本脫二尺字下文翠旒十二記

珠旒並據宋史及文獻通考改

仁宗延祐元年冬十有二月定服色等第 按元典章
作二年二月事

欽定四庫全書

史部

元史卷七十九至八十一

御史^臣徐如澍覆勘

總校官編修臣朱鈐

欽定四庫全書

元史卷七十九

明翰林學士亞中大夫知制誥兼修國史宋濂等修

志第七十九

輿服二

儀仗

皂纛

開諸詩如利

建纛

纛于素漆竿凡行幸則先驅建纛夾以

馬鼓居則置纛于月華西門之隅室絳麾金塗竿上

施圓盤朱絲拂三層紫羅袋韜之 金節制如麾八層
韜以黃羅雲龍袋 引導節金塗龍頭朱漆竿懸五色
拂上施銅鉞 朱雀幢制如節而五層韜以紅繡朱雀
袋 青龍幢制如前韜以碧繡青龍袋 白虎幢制如
前韜以素繡白虎袋 玄武幢制如前韜以皂繡玄武
袋 爆稍制如節頂刻爆牛首有袋上加碧油 絳引
幡四角朱綠蓋每角垂羅文雜佩繫于金銅鈎竿竿以
朱飾懸五色間暈羅下有橫木板作碾玉文 告止幡

緋帛錯綵為告止字承以雙鳳立仗者紅羅銷金升龍
餘如絳引 傳教幡制如告止幡錯綵為傳教字承以
雙白虎立仗者白羅繪雲龍 信幡制如傳教幡錯綵
為信字承以雙龍立仗者繪飛鳳 黃麾幡制如信幡
錯綵為黃麾篆 龍頭竿繡氅竿如戟無鈎下有小橫
木刻龍頭垂朱綠蓋每角綴珠佩一帶末有塗金銅鈴
圍子制以金塗攢竹枝首貫銅錢而以紫絹冒之
副竿制以木朱漆之 火輪竿制以白鐵為小車輪建

于白鐵竿首輪及竿皆金塗之上書西天呪語帝師所制常行為親衛中道正行在劈正斧之前以法佛衛以祛邪僻以鎮轟雷焉蓋辟惡車之意也 豹尾竿制如

戟繫豹尾朱漆竿 寶輿方案緋羅銷金雲龍案衣緋

羅銷金蒙襯複案傍有金塗鐵鞫四龍頭竿結綬二副

之 香鐙朱漆案黃羅銷金雲龍案衣上設金塗香爐

一燭臺二案旁金塗鐵鞫四龍頭竿結綬二副之 香

案朱漆案緋羅銷金雲龍案衣上設金香爐各一餘

同香鑒殿庭陳設則除龍頭竿結綬 詔案制如香案

冊案制如前 寶案制如前 表案制如香案上加

矮闌金塗鐵鞠四竿二副之緋羅銷金蒙複 禮枋案

制如表案 交椅銀飾之塗以黃金 杌子四脚小牀

銀飾之塗以黃金 鳴鞭綠柄鞭以梅紅絲為之梢用

黃茸而漬以蠟 鞭桶制以紫絕表白絹裏皮緣兩末

蒙鞍青錦緣緋錦複 水瓶制如湯瓶有蓋有提有

甬銀為之塗以黃金 鹿盧制如乂字兩頭卷塗金粧

銀朱絲繩副之 水盆黃金塗銀粧銀為之 淨巾緋

羅銷金雲龍有裏 香毬制以銀為座上插蓮花爐爐

上罩以圓毬鏤網縵旋轉文于上黃金塗之 香合制

以銀徑七寸塗黃金銀雲龍於上 金拂紅犛牛尾為

之黃金塗龍頭柄 唾壺制以銀寬緣虛腹有蓋黃金

塗之 唾盃制以銀圓如缶有蓋黃金塗之 外辦牌

制以象牙書國字背書漢字填以金 外備牌制如前

中嚴牌制如前 時牌制同外備而小 版位制以

木長一尺二寸闊一尺厚六分白髹黑字 大繖赤質
正方四角銅螭首塗以黃金紫羅衣緋絹裏諸繖蓋宋
以前皆平頭今加金浮屠 紫方繖制如大繖而表以
紫羅 紅方繖制如大繖而表以緋羅 華蓋制如繖
而圓頂隆起赤質繡雜花雲龍上施金浮屠 曲蓋制
如華蓋緋氎水繡瑞草曲柄上施金浮屠 導蓋制如
曲蓋緋羅氎水繡龍朱漆直柄 朱繖制如導蓋而無
文 黃繖制如朱繖而色黃 葆蓋金漆龍頭竿懸以

纓絡銷金圓裙六角葆蓋 孔雀蓋朱漆竿首建小蓋
蓋頂以孔雀毛徑尺許下垂孔雀尾簷下以青黃紅漉
水圓之上施金浮屠蓋居竿三之一竿塗以黃金書西
天咒語與火輪竿義同 朱團扇緋羅繡盤龍朱漆柄
金銅飾導駕團扇盛金線 大雉扇制稍長下方而上
摳緋羅繡象雉尾中有雙孔雀間以雜花下施朱漆橫
木連柄金銅裝 中雉扇制如大雉扇而減小 小雉
扇制如中雉扇而減小 青漉水扇制圓而青色四周

漚水以青絹 單朱膝結網二螭首銜紅絲拂中有獸
面朱漆柄金銅裝 罕制形如扇朱膝網中有獸面朱
漆柄金銅裝 旗扇錡即坐也旗錡制十字木于上下
四枝交拱置竅于其上以樹旗扇錡制如梔形小六木
拱于上而制作精于旗錡並漆以朱 風伯旗青質赤
火焰脚畫神人犬首朱髮兕形豹汗胯朱袴負風囊立
雲氣中 雨師旗青質赤火焰脚畫神人冠五梁冠朱
衣黃袍黑襴黃帶白袴皂舄右手仗劔左手捧鍾 雷

公旗青質赤火焰脚畫神人犬首鬼形白擁項朱犢鼻
黃帶右手持斧左手持鑿運連鼓于火中 電母旗青

質赤火焰脚畫神人為女子形纁衣朱裳白袴兩手運

光 金星旗素質赤火焰脚畫神人冠五梁冠素衣皂

欄朱裳秉圭 水星旗黑質赤火焰脚畫神人冠五梁

冠皂衣皂欄綠裳秉圭 木星旗青質赤火焰脚畫神

人冠五梁冠青衣皂欄朱裳秉圭 火星旗赤質青火

焰脚畫神人冠五梁冠朱衣皂欄綠裳秉圭 土星旗

黃質赤火焰脚畫神人冠五梁冠黃衣皂襪綠裳秉圭
攝提旗赤質赤火焰脚畫神人冠五梁冠素中單黃
衣朱蔽膝綠裳仗劍 北斗旗黑質赤火焰脚畫七星
角宿旗青質赤火焰脚畫神人為女子形露髮朱袍
黑襪立雲氣中持蓮荷外仗角亢以下七旗並青質青
火焰脚角宿繪二星下繪蛟 亢宿旗青質赤火焰脚
畫神人冠五梁冠素衣朱袍皂襪皂帶黃裳持黑等子
外仗繪四星下繪龍 氐宿旗青質赤火焰脚畫神人

冠小冠衣金甲朱衣綠色肚朱擁項白袴左手仗劍乘
一鰲外仗繪四星下繪貉房宿旗青質赤火焰腳畫
神人烏巾白中單碧袍黑襴朱蔽膝黃帶黃裙朱烏左
手仗劍外仗繪四星下繪兔心宿旗青質赤火焰腳
畫神人冠五梁冠朱袍皂襴右手持杖外仗繪三星下
繪狐尾宿旗青質赤火焰腳畫神人冠束髮冠素衣
黃袍朱裳青帶右手持劍左手持弓外仗繪九星下繪
虎箕宿旗青質赤火焰腳畫神人烏巾衣淺朱袍皂

欄仗劍乘白馬于火中外仗繪四星下繪豹 斗宿旗
青質赤火焰脚畫神人被髮素腰裙朱帶左手持杖外
仗斗牛以下七旗並黑質黑火焰脚斗宿繪六星下繪
獅 牛宿旗青質赤火焰脚畫神人牛首皂欄黃裳皂
烏外仗繪六星下繪牛 女宿旗青質赤火焰脚畫神
人烏牛首衣朱服皂欄黃帶烏鞞左手持蓮外仗繪四
星下繪龜 虛宿旗青質赤火焰脚畫神人被髮裸形
坐于甕中右手持一珠外仗繪二星下繪鼠 危宿旗

青質赤火焰脚畫神人虎首金甲衣朱服豹皮汗胯青帶烏鞞外仗上繪三星下繪燕 室宿旗青質赤火焰脚畫神人丁髮朱服乘舟水中外仗繪二星下繪猪

壁宿旗青質赤火焰脚繪神人為女子形被髮朱服皂襪綠帶白裳烏舄外仗繪二星下繪猢 奎宿旗青質

赤火焰脚畫神人狼首朱服金甲綠包肚白汗胯黃帶烏鞞仗劍外仗奎婁以下七旗並素質素火焰脚奎宿繪十六星下繪狼 婁宿旗青質赤火焰脚畫神人烏

巾素衣皂袍朱蔽膝黃帶綠裳烏鳥左手持烏牛角右手仗劍外仗繪三星下繪狗 胃宿旗青質赤火焰脚

繪神人被髮裸形披豹皮白腰裙黃帶右手仗劍外仗繪三星下繪雉 昂宿旗青質赤火焰脚繪神人黃牛

首朱服皂襪黃裳朱鳥左手持如意外仗繪七星下繪

鷄 畢宿旗青質赤火焰脚繪神人作鬼形朱視持黑

杖乘赤馬行于火中外仗上繪八星下繪烏 觜宿旗

青質赤火焰脚繪神人冠緇布冠朱服皂襪綠裳持一

蓮坐于雲氣中外仗繪三星下繪猴參宿旗青質赤
火焰脚繪神人被髮衣黃袍綠裳朱帶朱舄左手持珠
外仗上繪十星下繪猿井宿旗青質赤火焰脚繪神
人烏巾素衣朱袍皂襪坐于雲氣中左手持蓮外仗井
鬼以下七旗並赤質赤火焰脚井宿繪八星下繪犴
鬼宿旗青質赤火焰脚畫神人作女子形被髮素衣朱
袍黃帶黃裳烏舄右手持杖外仗繪五星下繪羊柳
宿旗青質赤火焰脚繪神人作女子形露髻朱衣黑襪

黃裳皂舄撫一青龍外仗繪八星下繪麋 星宿旗青
質赤火焰脚繪神人冠五梁冠淺朱袍皂襪青帶黃裳
烏舄持黃稱外仗繪七星下繪馬 張宿旗青質赤火
焰脚繪神人衣豹皮朱帶素鞞右手仗劍坐于雲氣中
外仗繪六星下繪鹿 翼宿旗青質赤火焰脚繪神人
冠道冠皂袍黃裳朱蔽膝仗劍履火于雲氣中外仗繪
二十星下繪蛇 軫宿旗青質赤火焰脚繪神人冠
道冠衣朱袍黃帶黃裳左手持書外仗繪四星下繪蚓

日旗青質赤火焰脚繪日于上奉以雲氣 月旗青

質赤火焰脚繪月于上奉以雲氣 祥雲旗青質赤火

焰脚繪五色雲氣 合璧旗青質赤火焰脚繪雲氣日

月 連珠旗青質赤火焰脚繪五星 東嶽旗青質赤

火焰脚繪神人冠七梁冠黃襖青袍綠裳白中單素蔽

膝執圭 南嶽旗赤質青火焰脚繪神人冠七梁冠黑

襖緋袍綠裳黃中單朱蔽膝執圭 中嶽旗黃質赤火

焰脚繪神人冠七梁冠皂襖黃袍綠裳白中單朱蔽膝

執圭 南嶽旗赤質青火焰脚繪神人冠七梁冠青襪
白袍緋裳白中單素蔽膝執圭 北嶽旗黑質赤火焰
脚繪神人冠七梁冠紅襪皂袍綠裳白中單素蔽膝執
圭 江瀆旗赤質青火焰脚繪神人冠七梁冠青襪朱
袍跨赤龍 河瀆旗黑質赤火焰脚繪神人冠七梁冠
皂襪黃袍跨青龍 淮瀆旗素質赤火焰脚繪神人冠
七梁冠皂襪素袍乘青鯉 濟瀆旗青質赤火焰脚繪
神人冠七梁冠皂襪青袍乘一鯢 天下太平旗赤質

青火焰脚錯采為字 皇帝萬歲旗赤質青火焰脚錯

采為字 吏兵旗黑質赤火焰脚繪神人具甲兜鍪綠

臂鞬仗劍 力士旗白質赤火焰脚繪神人武士冠緋

袍金甲汗膝皂履執戈盾 東天王旗青質赤火焰脚

繪神人武士冠衣金甲緋裔褶右手執戟左手奉塔履

石 南天王旗赤質青火焰脚繪神人冠服同前 西

天王旗白質赤火焰脚繪神人冠服同前 北天王旗

黑質赤火焰脚繪神人冠服同前 大神旗黃質黃火

焰脚詳見牙門旗下 牙門旗赤質赤火焰脚繪神人

冠武士冠鎧甲襖褙襯肩包脚汗膝束帶長帶大口袴

執戈戟 金鼓旗黃質黃火焰脚書金鼓字 朱雀旗

赤質赤火焰脚繪朱雀其形如鷹 玄武旗黑質黑火

焰脚繪龜蛇 青龍旗青質赤火焰脚繪蹲龍 白虎

旗白質赤火焰脚繪蹲虎 龍君旗青質赤火焰脚繪

神人冠通真冠服青繡衣白裙朱履執戟引青龍 虎

君旗白質赤火焰脚繪神人冠流精冠服素羅繡衣朱

裙朱履執斬蛇劔引白虎

大黃龍負圖旗青質青火

焰脚繡複身黃龍背八卦

小黃龍負圖旗青質青火

焰脚繪複身黃龍背八卦

五色龍旗五色質五色直

脚無火焰

大四色龍旗青赤黃白四色質俱火焰脚

小四色龍旗制同大四色直脚無火焰

應龍旗赤

質赤火焰脚繪飛龍

金鸞旗赤質青火焰脚繪鸞而

金色

鸞旗制同前而繪以五采

金鳳旗赤質青火

焰脚繪鳳而金色

鳳旗制同前而繪以五采

五色

鳳旗五色質五色直脚無火焰 大四色鳳旗青赤黃

白四色質火焰脚色隨其質繪鳳 小四色鳳旗制同

前直脚無火焰 玉馬旗赤質青火焰脚繪白馬兩膊

有火焰 駃騠旗赤質青火焰脚繪白馬 飛黃旗赤

質赤火焰脚形如馬色黃有兩翼 驪騮旗青質青火

焰脚繪獸形如馬白首虎文赤尾 龍馬旗赤質青火

焰脚繪龍馬 麟旗赤質青火焰脚繪麒麟 飛麟旗

赤質青火焰脚繪飛麟其形五色身朱翼兩角長爪

黃鹿旗赤質青火焰脚繪獸如鹿而色深黃 兕旗赤

質青火焰脚繪獸似牛一角青色 犀牛旗赤質青火

焰脚繪犀牛 金牛旗赤質青火焰脚繪獸形如牛金

色 白狼旗赤質青火焰脚繪白狼 辟邪旗赤質赤

火焰脚繪獸形似鹿長尾二角 赤熊旗赤質赤火焰

脚繪獸如熊色黃 三角獸旗赤質赤火焰脚繪獸其

首類白澤綠髮三角青質白腹跋尾綠色 角端旗赤

質赤火焰脚繪獸如羊而小尾頂有獨角 駟牙旗赤

質青火焰脚繪獸形似麋齒前後一齊 太平旗赤質

青火焰脚金描蓮花四上金書天下太平字 鷄鵝旗

赤質青火焰脚繪鳥似山鷄而小冠背黃腹赤項綠尾

紅 蒼烏旗赤質青火焰脚繪鳥如烏而色蒼 白澤

旗赤質赤火焰脚繪獸虎首朱髮而有角龍身 東方

神旗綠質赤火焰脚繪神人金兜牟鎧甲仗劍 已下四旗所繪

同神 西方神旗白質赤焰脚 中央神旗黃質赤火焰

脚 南方神旗赤質青火焰脚 北方神旗黑質赤

火焰脚 凡立仗諸旗各火焰脚三條色與質同長一丈五尺杠長二丈一尺牙門太平萬歲質長一丈橫闊五尺日月龍君虎君橫豎並八尺餘旗並豎長八尺橫闊六尺 車輻朱漆八稜施以銅釘形如柯舒 吾杖朱漆金飾兩末 鐙杖朱漆捧首標以金塗馬鐙 爰制如稍而短黑飾兩末中畫雲氣上綴朱絲拂 骨朶朱漆捧首貫以金塗銅錐 列絲骨朶制如骨朶加紐 絲丈 卧爪制形如爪塗以黃金卧置朱漆捧首 立

瓜制形如瓜塗以黃金立置朱漆捧首 長刀長丈有
奇闊上窄下單刃 儀刀制以銀飾紫絲帔鍔 橫刀
制如儀刀而曲鞘以沙魚皮飾倭草帔鍔 千牛刀制
如長刀 劔斑鞘飾以沙魚皮劔口兩刃 班劔制劔
鞘黃質紫斑文金銅裝紫絲帔鍔 刀盾之刀制如長
刀而柄短木為之青質有環紫絲帔鍔 刀盾之盾制
以木赤質畫異獸執人右刀左盾 朱滕絡盾制同而
朱其質 綠滕絡盾制同而綠其質 戟制以木有枝

塗以黃金竿以朱漆 小戟飛龍掌制如戟畫雲氣上
綴飛掌垂五色帶末有銅鈴掌下方而上兩角微攢繪
龍於其上 釵戟制如戟無飛掌而有橫木 稍制以
木黑質畫雲氣上刻刃塗以青五色稍並同而質異
攢制如戟鋒兩旁微起下有鐔銳 叉制如戟而短青
飾兩末中白畫雲氣上綴紅絲拂 斧雙刃斧貫于朱
漆竿首 鉞金塗鐵鉞單刃腦後繫朱拂朱漆竿 劈
正斧制以玉單刃金塗柄銀鐔 儀鎗斧制如斧刻木

為之柄以朱上綴小錦旛五色帶 弓矢 弩制如弓

而有臂 服制以虎豹皮或暴綠文金銅裝 鞞制以

黑革 蘭弩矢室 象鞞鞍五采裝明金木蓮花座緋

繡攀鞍條紫繡檐襦紅錦屨鍤石蓮花跋塵錦緣羶盤

紅羣牛尾纓拂并胸攀鞞攀上各帶紅羣牛尾纓拂鍤

石胡桃鍤子杏葉鍤具緋皮轡頭鍤具蓮花座上金塗

銀香爐一元初既定占城交趾真臘歲貢象育于析津

坊海子之陽行幸則蕃官騎引以導大駕以駕巨羣

駝鼓設金裝鉸具花扇鞍褥橐籥前峰樹皂纛或施采
旗後峰樹小旗絡腦當胸後鞞並以毛組為轡勒五色
璫玉毛結纓絡周綴銅鐸小鏡上施一面有底銅捫小
鼓一人乘之繫以毛繩凡行幸先鳴鼓于駝以威振遠
邇亦以試橋梁伏水而次象馬 騾鼓制似駝而小

馬鼓轡勒後勒當胸皆綴紅纓拂銅鈴杏葉鉸具金塗
鈿上挿雉尾上負四足小架上施以革鼓一面一人前
引凡行幸負鼓于馬以先馳與纛並行 誕馬纓轡緋

涼鐵 御馬鞍轡纓複金 珂馬銅面堆尾鼻拂胸上
綴銅杏葉紅絲拂又胸前腹下皆有攀綴銅鈴後有跋
塵錦包尾

崇天鹵簿

中道 頓遞隊象六飾以金裝蓮座香爐寶鞍轡鞦轡
屬勒犂牛尾拂跋塵鉸具導者六人馭者南越軍六人
皆弓花角唐帽緋絕銷金襖衫鍍金束帶烏鞞橫列而
行次駝鼓九飾以鍍金鉸具轡飾屬籠旗鼓纓槍馭者

九人服同馭象者中道相次而行次舍人二人四品服
騎分左右夾駝而行次青衣四人武弁青純衫青勒帛
青鞞執青杖次清道官四人本品服騎次信幡二執者
二人引護者四人武弁黃純生色寶相花袍黃勒帛黃
鞞次騾鼓六飾騾以鍍金鉸具轡崗籠旗鼓纓槍馭者
六人服同馭馳者次告止幡二執者二人引護者四人
武弁緋純生色寶相花袍紅勒帛紅鞞次傳教幡二執
者二人引護者四人武弁黃純生色寶相花袍黃勒帛

黃鞞並分左右次橋道頓遞使一人本品服騎中道舍人清道官橋道頓遞使從者凡七人錦帽紫襖衫小銀

束帶行膝鞋襪

後凡從者之服皆同此

纛稍隊全吾將軍二人

交角幘頭緋羅繡抹額紫羅繡辟邪襖紅錦襯袍錦
騰蛇金帶烏鞞橫刀佩符騎分左右次弩而騎者五人
錦帽青絁生色寶相花袍銅帶綠雲鞞次稍而騎者五
人錦帽緋絁生色寶相花袍銅帶朱雲鞞次纛一執者
一人夾者四人護者二人皆錦帽紫生色寶相花袍鍔

金帶紫雲鞞押燾官二人皆騎本品服次馬鼓四飾如
騾鼓馭者四人服同御騾次佩弓矢而騎者五人服同
執弩者押衙四人騎而佩劔錦帽紫絁生色寶相花袍
鍍金帶雲頭鞞襍稍者四人騎錦帽絁絁生色寶相花
袍銅帶朱鞞控馬八人錦帽紫衫銀帶烏鞞次稍而騎
者五人服佩同執弩者金吾將軍押燾官從者四人服
同前隊 朱雀隊舍人一人四品服騎而前次朱雀旗
一執者一人引護者四人錦帽絁絁生色鳳花袍銅帶

朱雲鞞皆佩劔而騎護者加弓矢次金吾折衝一人交
角幟頭緋純繡抹額紫羅繡辟邪襖襠紅錦襯袍金帶
錦腰蛇烏鞞橫刀佩弓矢而騎帥甲騎凡二十有五弩
五人次弓五人次稍五人次弓五人次稍五人皆冠甲
騎冠朱畫甲青勒甲條鍍金環白繡汗胯束帶紅鞞帶
弓箭器仗馬皆朱甲具裝珂飾金舍人金吾折衝從者
凡二人服同前隊 十二旗隊舍人一人四品服騎而
前金吾果毅二人交角幟頭緋羅繡抹額紫羅繡辟邪

衲襦紅錦襯袍金帶錦騰蛇烏鞞橫刀佩弓矢騎分左
右帥引旗騎士五皆錦帽黃生色寶相花袍銀帶烏鞞
次風伯旗左雨師旗右雷公旗左電母旗右執者四人
騎青甲騎冠綠甲青勒甲條鍍金環白繡汗胯束帶青
雲鞞馬皆青甲珂飾次五星旗五執者五人甲騎冠五
色畫甲青勒甲條鍍金環白繡汗胯束帶五色鞞馬甲
如其甲之色珂飾次北斗旗一執者一人甲騎冠紫畫
甲青勒甲條鍍金環白繡汗胯束帶紫雲鞞馬甲隨其

甲之色珂飾左右攝提旗二執者二人甲騎冠朱畫甲
青勒甲條鍍金環白繡汗胯束帶紅雲韉馬朱甲珂飾
執副竿者二人騎錦帽黃生色寶相花袍銀帶烏韉執
稍而護者五人騎服同執副竿者舍人金吾果毅從者
凡三人服同前隊門旗隊舍人二人四品服監門將
軍二人皆交角幘頭緋絕繡抹額紫羅繡獅子襖襠紅
錦襯袍金帶烏韉橫刀佩弓矢騎馬甲珂飾金次門旗
二執者二人錦帽緋絕生色獅子文袍銅革帶紅雲韉

劔而騎引護者四人服佩同執人而加弓矢騎次監門
校尉二人騎服佩同監門將軍分左右行次鸞旗一執
者一人引護者四人錦帽五色純生色瑞鸞花袍束帶
五色雲鞞佩劔護人加弓矢皆騎舍人監門將軍監門
校尉從者凡六人服同前隊 雲和樂雲和署令二人
朝服騎分左右引前行凡十有六人戲竹二排簫四簫
管二龍笛二板二歌工四皆展角花幘頭紫純生色雲
花袍鍍金帶紫鞞次琵琶二十箏十有六笙篴十有六

簫十有六方響八頭管二十有八龍笛二十有八已上
工百三十有三人皆花幘頭緋絁生色雲花袍鍍金帶
朱鞞次杖鼓三十二人花幘頭黃生色花襖紅生色花
袍錦臂鞞鍍金帶烏鞞次板八工人服色同琵琶工人
次大鼓二工人服色同杖鼓工人雲和署令從者二
人服同前隊 殿中黃麾隊舍人二人四品服殿中侍
御史二人本品服皆騎次黃麾一執者一人夾者二人
騎武弁緋絁生色寶相花袍紅勒帛紅雲鞞舍人殿中

侍御史從者凡四人服同前隊 太史鉦鼓隊太史一人本品服騎引交龍桐鼓左金鉦右舁四人工二人皆武弁緋絁生色寶相花袍紅勒帛紅鞞次司辰郎一人左典事一人右並四品服騎太史司辰郎典事從者三人服同前隊 武衛釭戟隊武衛將軍一人交角幟頭緋羅繡抹額紫羅繡瑞鷹兩襠紅錦襯袍錦膝蛇金帶橫刀騎領五色繡旛一金節八罕右罩左朱雀青龍白虎幢三橫巾導蓋一中道又四武舉果毅二人服佩同

武衛將軍釵二十戟二十徒五十有九人武弁緋純生
色寶相花袍紅勒帛紅鞞武衛將軍武衛果毅從者凡
三人服同前隊 龍墀旗隊舍人二人四品服中郎將
二人服佩同釵戟隊武衛將軍騎分左右帥騎士凡二
十有四人執旗者八人天下太平旗中道中嶽帝旗左
中央神旗右次日旗左月旗右次祥雲旗二分左右次
皇帝萬歲旗中道執人皆黃純巾黃純生色寶相花袍
黃勒帛黃雲鞞橫刀引者八人青純巾青純生色寶相

花袍青勒帛青雲鞞橫刀執弓矢護者八人緋純巾緋
純生色寶相花袍紅勒帛紅雲鞞橫刀執弓矢舍人中
郎將從者凡四人服同前隊 御馬隊舍人二人四品
服引左右衛將軍二人緋羅繡抹額紫羅繡瑞馬襴襠
紅錦襯袍錦腰蛇金帶烏鞞橫刀皆騎分左右行御馬
十有二匹分左右飾以纓轡鞍複馭士控鶴二十有四
人交角金花幘頭紅錦控鶴襖銅束帶鞞鞋次尚乘奉
御二人四品服騎分左右行舍人左右衛將軍從者四

人服同前隊 拱衛控鶴第一隊拱衛指揮使二人本品服騎分左右帥步士凡二百五十有二人負劔者三十人次執吾杖者五十人次執斧者五十人次執鐙杖者六十人次執列絲骨朵者三十人皆分左右次携金水瓶者一人左金盃者一人右次執列絲骨朵者三十人皆分左右皆金縷額交角幘頭青濟遼控鶴襖塗金荔枝束帶鞵鞋拱衛指揮使從者二人服同前隊 安和樂安和署令二人本品服騎分左右行領押職二人

弓角鳳翅金花幘頭紅濟遜加襴袍金束帶花鞞次扎
鼓八為二重次和鼓一中道次板二次龍笛四次頭管
二次羌笛二次笙二次簫二左右行次雲璈一中道工
二十有四人皆弓角鳳翅金花幘頭紅錦濟遜襖金荔
枝束帶花鞞從者二人服同前隊 金吾援寶隊舍人
二人四品服引金吾將軍二人交角幘頭緋羅繡抹額
紫羅繡辟邪襦褙紅錦襯袍錦襍蛇橫刀佩弓矢皆騎
分左右前引駕十二重甲士一十二騎弩四次弓四次

稍四為三重次香案二金爐各各二分左右舁士十有
六人侍香二人騎而從次典瑞使二人本品服騎而左
右引八寶受命寶左傳國寶右次天子之寶左皇帝之
寶右次天子行寶左皇帝行寶右次天子信寶左皇帝
信寶右每與寶盞銷金蒙複襯複案與紅銷金衣龍頭
竿結綬舁士八人朱團扇四人凡九十有六人皆交角
金花幙頭青紅錦濟遜襖每與前青後紅金束帶鞞鞋
援寶三十人交角金花幙頭窄紫衫銷金紅汗膝金束

帶烏鞋執金縷黑杖次符寶郎二人四品服騎分左右
次金吾果毅二人服佩同金吾將軍騎分左右次稍四
人次弓四人次弩四人為三重舍人金吾將軍侍香典
瑞使符寶郎金吾果毅從者凡十有二人服同前隊
殿中繖扇隊舍人二人四品服騎分左右領騎而執旗
者四人日月合璧旗左五星連珠旗右次金龍旗左金
鳳旗右黃純巾黃純生色寶相花袍黃勒帛黃鞞佩劍
騎而引旗者四人青純巾青純生色寶相花袍青勒帛

青鞵佩劔執弓矢騎而護旗者四人紅絁巾紅絁生色
寶相花袍紅勒帛紅鞵佩劔執弓矢次朱團扇十有六
次小雉扇八次中雉扇八次大雉扇八為十重重四人
次曲蓋二紅方纈二次紫方纈二次華蓋二次大纈二
執者五十人武弁紅絁生色寶相花袍紅勒帛紅鞵舍
人從者二人服同前隊 控鶴圍子隊圍子頭一人執
骨朶由中道交角幙頭緋錦濟遜襖鍍金荔枝帶鞵鞋
領執圍子十有六人分左右交角金花幙頭白襯肩青

錦濟遜襖鍍金荔枝帶鞘鞋次朱纈中道次金脚踏左
金椅右服如圍子頭拱衛指揮使一人本品服騎中道
控鶴二十人服同上拱衛指揮使從者二人服同前隊
天樂一部天樂署令二人本品服騎分左右領押職
二人弓角鳳翅金花幘頭紅錦濟遜襖加欄金束帶花
鞞次琵琶二篋篋二和必斯二板二箏二胡琴二笙二
頭管二龍笛一響鐵一工十有八人徒二人皆弓角鳳
翅金花幘頭紅錦濟遜襖鍍金束帶花鞞 控鶴第二

隊僉拱衛司事二人本品服騎分左右帥步士凡七十
有四人執立瓜者三十有六人分左右次捧金杙一人
左鞭桶一人右次蒙鞍一人左散手一人右次執立瓜
者三十有四人分左右皆交角金花幟頭緋錦濟遜襖
鍍金荔枝帶韜鞋僉拱衛司事從者二人服同前隊
殿中導從隊舍人二人四品服騎分左右引香案一黃
銷金盤龍衣金爐合結綬龍頭竿舁者十有二人交角
金花幟頭紅錦濟遜控鶴襖鍍金束帶韜鞋侍香二人

騎分左右次警蹕三人交角幟頭紫窄袖衫鍍金束帶
烏鞞次舍人二人四品服騎引天武官二人執金鉞金
鳳翅兜牟金鎖甲青勒甲條金環繡汗胯金束帶馬珂
飾次金骨朶二次幢二次節二分左右次金水盆左金
椅右次蒙複左副執椅右次金水瓶鹿盧左銷金淨巾
右次金香毬二金香合二分左右次金唾壺左金唾盃
右金拂四扇十分左右次黃繖中道繖衣從凡騎士三
十人服如警蹕加白繡汗胯步卒四人

執椅二人蒙複
一人繖衣一人

服如昇香鑾徒舍人天武官從者六人服同前隊 控
鶴第三隊拱衛直鈐轄二人本品服騎引執卧爪八十
人服如第二隊 導駕官引進使二人分左右前行次
給事中一人左起居注一人右侍御史一人左殿中侍
御史一人右次翰林學士一人左集賢學士一人右次
御史中丞一人左同知樞密院事一人右次御史大夫
一人左知樞密院事一人右次侍儀使四人中書侍郎
二人黃門侍郎二人侍中二人皆分左右次儀仗使一

人左鹵簿使一人右次禮儀使二人分左右持劈正斧
一人中道次大禮使一人左太尉一人右皆本品服騎
從者三十人惟執劈正斧官從者二人服同前隊 羽
林宿衛舍人二人四品服前行次羽林將軍二人交角
幘頭緋羅繡抹額紫羅繡瑞鷹衲襠紅錦襯袍錦膝蛇
金帶烏鞞橫刀佩弓矢皆騎分左右領宿衛騎士二十
人執骨朶六人次執短戟六人次執斧八人皆弓角金
鳳翅幘頭紫袖細褶襪線襖束帶烏鞞橫刀舍人羽林

將軍從者凡四人服同前隊

檢校官

分布中道之外外仗之內預

遞隊監察御史二人本品服次轟稍隊巡杖檢校官二

人次朱雀隊金吾中郎將二人皆交角幘頭緋羅繡抹

額紫羅繡辟邪衲襜紅錦襯袍錦騰蛇金帶烏鞞佩儀

刀加弓矢次十二旗隊兵部侍郎二人本品服次門旗

隊糾察儀仗官二人本品服次雲和樂部金吾將軍二

人服佩如金吾中郎將知隊仗官二人本品服次武衛

鉞戟隊監察御史二人本品服次外道左右牙門巡仗

監門中郎將二人交角幘頭緋羅繡抹額紫羅繡獅子
襖襠紅錦襯袍錦蟒蛇金帶烏鞞佩儀刀弓矢次金吾
援寶隊兵部尚書二人次巡仗檢校官二人次殿中緞
扇隊監察御史二人次禮部尚書二人皆本品服次團
子隊知隊仗官二人次金吾大將軍二人服同金吾將
軍各爆稍從次殿中導從隊糾察儀仗官二人次巡仗
檢校官二人次羽林宿衛隊左點檢一人左右點檢一
人右紫羅繡瑞麟襖襠餘同金吾大將軍領大黃龍負

國旗二執者二人夾者八人騎錦帽五色純巾五色純
生色雲龍袍塗金束帶五色雲鞞佩劍夾者加弓矢並
行中道控鶴外外仗內前後檢校仗內知班六人展角
幟頭紫窄衫塗金束帶烏鞞承奉班都知一人太常博
士一人皆朝服騎同檢校官前後巡察宿直將軍八人
服佩同左右點檢夾輅檢校官衛 陪輅隊誕馬二疋
珂飾纓轡青氍毹乘黃令二人本品服分左右次殿前將
軍二人交角幟頭緋羅繡抹額紫羅繡辟邪褱襠紅錦

視袍錦螭蛇金帶烏鞞橫刀騎玉輅太僕卿馭本品服
千牛大將軍驂乘交角幘頭紅抹額繡瑞牛兩襠紅錦
視袍錦螭蛇金帶烏鞞橫刀左右衛將軍服如千牛大
將軍惟兩襠繡瑞虎文陪輅馬六匹珂飾纓轡青履
牽套鞶帶步卒凡八十有二人馭士四人駕士六十有
四人行馬二人踏道八人推卒二人托叉一人梯一人
皆平巾青幘青繡雲龍花袍塗金束帶青鞞教馬官二
人進輅職長二人皆本品服夾輅將軍二人金鳳翅兜

年金鎖甲條環繡汗胯金束帶綠雲花鞞青氎水扇二
次千牛備身二人皆分左右交角幘頭緋羅繡抹額紫
羅繡瑞牛柄襜紅錦襯袍金帶烏鞞橫刀佩弓矢獻官
二人殿中監六人內侍十人皆本品朝服騎分左右十
牛備身後騎而執弓矢者十人尚衣奉御四人尚食奉
御二人尚藥奉御二人皆騎本品服次腰輿黃紵絲銷
金雲龍蒙複步卒凡十有三人舁八人導扇四人黃繖
一人皆交角金花幘頭紅濟遜控鶴襖金束帶鞞鞋尚

舍奉御二人騎左尚輦奉御二人騎右皆朝服從者三十有四人服同前隊 大神牙門旗隊都點檢一人騎交角幟頭緋羅繡抹額紫羅繡瑞麟襖襠紅錦襯袍次監門大將軍二人分左右騎服如都點檢惟襖襠紫繡獅文門凡三重親衛郎將帥甲士分左右夾輅而陣繞出輅後合執氅者二為第一門翊衛郎將帥護尉夾親衛而陣繞出輅後合為第二門監門校尉二人騎左右衛大將軍帥甲士執五色龍鳳旗夾護尉而陣繞出輅

後合牙門旗二為第三門監門校尉二人主之服色詳
見外仗 雲和樂後部雲和署丞二人本品服騎分左
右領前行戲竹二排簫二簫管二歌工二凡十人皆騎
花幘頭紫絕生色花袍塗金帶烏鞞次琵琶四箏四笙
篪四簫四頭管六方響二龍笛六杖鼓十四十人皆騎
服同上惟絕色紅從者二人服同前隊 後黃麾隊玄
武幢一絳麾二徒三人皆武弁紫絕生色龜雲花袍紫
羅勒帛紫鞞次黃麾執者一人夾者二人皆騎豹尾一

執者一人夾者二人皆騎武弁紫生色寶相花袍紫勒
帛紫鞵 玄武黑甲掩後隊金吾將軍一人騎中道交
角幟頭緋羅繡抹額紫羅繡辟邪襖襠紅錦襯袍金帶
錦縵蛇烏鞵佩刀後衛指揮使二人騎分左右服同各
衛指揮使帥甲騎五十有七人玄武旗一執者一人夾
者二人小金龍鳳黑旗二執者二人皆黑兜牟金飾黑
甲條環汗胯束帶鞵帶弓矢器仗馬黑金色獅子甲珂
飾稍四十人弩十人黑兜牟黑甲條環汗胯束帶鞵帶

弓矢器仗馬黑甲珂飾執衛司爆稍二人錦帽紫生色
辟邪文袍鍍金帶烏鞞從者三人服同前隊

外仗

金鼓隊金鼓旗二執者二人引護者八人皆五色絕巾
生色寶相花五色袍五色勒帛鞞佩劍引護者加弓矢
分左右次折衝都尉二人交角幟頭緋羅繡抹額紫羅
繡辟邪衲襠紅錦襯袍金帶錦腰蛇騎帥步士凡百二
十人鼓二十四人鉦二十四人並黃絕巾黃絕生色寶

相花袍黃勒帛黃鞞角二十四人紅絕巾紅絕生色寶
相花袍紅勒帛紅鞞車輻棒二十四人長刀二十四人
並金飾青兜牟青甲條環白繡汗胯束帶青雲鞞 清
游隊舍人二人四品服騎導金吾折衝二人交角幟頭
緋羅繡抹額紫羅繡辟邪衲襦紅錦襯袍金帶錦腰蛇
橫刀佩弓矢騎分左右帥步士凡百有十人白澤旗二
執者二人引護者八人次執弩二十人次執稍二十人
次執弓二十人次執稍二十人次執弓二十人皆甲騎

冠金飾綠畫甲條環白繡汗胯束帶綠雲韡佩弓矢器
仗馬金飾朱畫甲珂飾分左右 欽飛隊鐵甲欽飛執
稍十有二人甲騎冠明鐵甲佩弓矢器仗馬鐵甲珂飾
次金吾果毅二人交角幘頭緋絕繡抹額紫羅繡辟邪
襖襠紅錦襯袍金帶錦滕蛇橫刀弓矢騎次虞侯欽飛
執弩二十人錦帽紅生色寶相花袍塗金帶烏韡 父
仗前隊領軍將軍二人交角幘頭緋絕繡抹額紫羅繡
白澤襖襠紅錦襯袍金帶錦滕蛇烏韡橫刀騎帥步士

五十執爨二十五人執爨二十五人錯分左右皆五色
絕生色巾寶相花五色袍五色勒帛五色雲頭鞞領軍
將軍從者二人錦帽紫襖衫小銀束帶行滕鞋鞵 諸

衛馬前隊舍人二人四品服騎導左右衛郎將二人交
角幘頭緋絕繡抹額紫繡瑞馬襖襠紅錦襯袍金帶錦
膝蛇烏鞞橫刀佩弓矢騎分左右帥騎士百五十六人
前辟邪旗左應龍旗右次玉馬旗左三角獸旗右次黃
龍負圖旗左黃鹿旗右次飛麟旗左馱駟旗右次鸞旗

左鳳旗右次飛黃旗左麒麟旗右執旗十有二人生色
黃袍巾勒帛鞞引旗十有二人服同執人惟袍色青護
旗十有二人生色紅袍巾勒帛鞞執弓六十人錦帽青
生色寶相花袍塗金帶烏鞞執稍六十人服如執弓者
惟袍色紅每旗弓五稍五從者四人服同前隊 二十
八宿前隊舍人二人四品服騎導領軍將軍二人紫羅
繡白澤襖襠餘如前隊左右衛郎將皆騎帥步士百二
有二人前并宿旗左參宿旗右各五盾從次鬼宿旗左

甬宿旗右各五弓從次柳宿旗左畢宿旗右各五纛從次星宿旗左昂宿旗右各五盾從次張宿旗左胃宿旗右各五弓從次翼宿旗左婁宿旗右各五纛從次軫宿旗左奎宿旗右各五盾從執旗十有四人色黃袍巾勒帛韡引旗十有四人服如執人惟袍巾色青護旗十有四人服如執人惟袍巾色紅執刀盾者三十人弓矢者二十人纛者二十人皆五色兜牟甲條環白綳汗膊束帶五色雲韡舍人領軍將軍從者四人服同前隊

左右領軍黃麾仗前隊舍人二人四品服騎導領軍將軍二人服佩如二十八宿旗隊領軍將軍騎分左右帥步士百五十人絳引旛十次龍頭竿繡氅十皆分左右次江漬旗左濟漬旗右次小戟十次弓十皆分左右次南方神旗左西方神旗右次鎧十次綠滕絡盾加刀十皆分左右次南岳帝旗左西岳帝旗右次龍頭竿氅十次朱滕絡盾加刀十皆分左右次南天王旗左西天王旗右次小戟十次弓十皆分左右次龍君旗左虎君旗

右次鎧十次綠膝終盾加刀十皆分左右執人一百三十人武弁五色生色寶相花袍勒帛韉引旗十人青生色寶相花袍巾勒帛韉護旗十人服同惟袍巾色紅

戈仗後隊領軍將軍二人騎帥步士凡五十人戈二十有五叉二十有五錯分左右服佩同前隊 左右牙門旗隊監門將軍二人騎紫羅繡獅子襖襠餘如戈仗隊領軍將軍之服佩次牙門旗四每旗執者一人引夾者二人並黃純巾黃純生色寶相花袍黃勒帛黃雲韉皆

騎次監門校尉二人騎服佩同監門將軍從者四人服
同前隊 左右青龍白虎隊舍人二人四品服騎導領
軍將軍二人服佩同戈仗隊之領軍將軍騎分左右帥
甲士凡五十有六人騎青龍旗左執者一人夾者二人
從以執弩五人弓十人稍十人皆冠青甲騎冠青鐵甲
青條金環束帶白繡汗胯青雲韉白虎旗右執者一人
夾者二人從以執弩五人弓十人稍十人皆冠白甲騎
冠白鐵甲青條金環束帶白繡汗胯白雲韉舍人領軍

將軍從者四人服	同前隊二十八宿後隊舍人二人四
品服騎導領軍將軍二人騎分左右帥步士百十二人	
角宿旗左壁宿旗右各從以執弓者五人次亢宿旗左	
室宿旗右各從以執翟者五人次氐宿旗左危宿旗右	
各從以執盾者五人次房宿旗左虛宿旗右各從以執	
弓者五人次心宿旗左女宿旗右各從以執翟者五人	
次尾宿旗左斗宿旗右各從以執盾者五人次箕宿旗	
左斗宿旗右各從以執弓者五人舍人領軍將軍從者	

四人執夾引從服佩皆同前隊 諸衛馬後隊舍人二
人四品服騎導左右衛果毅都尉二人騎分左右帥衛
士百五十有六人角端旗左赤熊旗右次兕旗左太平
旗右次驪驪旗左騶牙旗右次犀牛旗左駿驎旗右次
蒼烏旗左白狼旗右次龍馬旗左金牛旗右舍人左右
衛果毅都尉從者四人執夾引從服佩同前隊 左右
領軍黃麾後隊舍人二人四品服騎導領軍將軍二人
騎分左右帥步士百六十人龍頭氍毹十次朱藤絡盾加

刀十皆分左右次吏兵旗左力士旗右次小戟十次弓
十皆分左右次東天王旗左北天王旗右次鎗十次綠
滕絡盾加刀十皆分左右次東岳帝旗左北岳帝旗右
次龍頭竿氅十次朱滕絡盾加刀十皆分左右次東方
方神旗左北方神旗右次小戟十次弓十皆分左右淮
濱旗左河濱旗右次鎗十次綠滕絡盾加刀十皆分左
右次絳引旛十分左右掩後舍人領軍將軍從者四人
執夾服佩並同前隊 左右衛儀刀班劔隊舍人二人

四品服騎導左右衛中郎將二人交角幘頭緋羅絹抹
額紫羅繡瑞馬襴襠紅錦襯袍錦膝蛇金帶烏鞞騎分
左右帥步士凡四十人班劔二十人儀刀二十人並錦
帽紅生色寶相花袍塗金束帶烏鞞舍人左右衛中郎
從者四人服同前隊 供奉宿衛步士隊供奉中郎將
二人交角幘頭緋絕絹抹額紫羅繡瑞馬襴襠紅錦襯
袍錦膝蛇金帶烏鞞橫刀佩弓矢騎分左右帥步士凡
五十二人執短戟十有二人次執列絲十有二人次又

戟十有二次斧十有六人分左右夾玉輅行皆弓角
金鳳翅幘頭紫細摺辮線襖塗金束帶烏鞞 親衛步

士隊親衛郎將二人服同供奉中郎將騎分左右帥步
士凡百四十有八人執龍頭竿氅四人次小戟十人次
氅二人次儀鎧十人次氅二人次小戟十人次氅二人
次儀鎧十人次氅二人次小戟十人次氅二人次儀鎧
十人次氅二人次小戟十人次氅二人次儀鎧十人次
氅二人次小戟十人皆分左右夾供奉宿衛隊次氅二

人次儀鎧十人次髦二人次小戟十人次髦二人次儀
鎧十人次髦二人折繞宿衛隊後而合其端為第一門
士皆金兜牟甲青勒甲條金環綠雲韉 翊衛護尉隊

翊衛郎將二人服同親衛郎將騎帥護尉騎士百有二
人皆交角金花幘頭窄袖紫衫紅銷金汗膝塗金束帶
烏韉執金裝骨朵分左右夾親衛隊行折繞隊後而合
其端為第二門 左右衛甲騎隊左右衛大將軍二人
服如翊衛郎將帥騎士百人執青龍旗五人左青鳳旗

五人右次青龍旗五人左赤鳳旗五人右次黃龍旗五人左黃鳳旗五人右次白龍旗五人左白鳳旗五人右次黑龍旗五人左黑鳳旗五人右次五色鳳旗二十五居左五色龍旗二十五居右曲統輅後合牙門旗為第三門士皆冠甲騎冠金飾朱畫甲青勒甲條鍍金環白繡汗膝紅鞞佩弓矢器仗馬青金毛獅子甲珂飾左

衛青甲隊左衛指揮使二人騎服紫羅繡雕虎襴襠餘同左右衛大將軍帥騎士三十有八人執大青龍旗一

人左大青鳳旗一人右次小青龍旗一人左小青鳳旗
一人右次大青鳳旗一人左大青龍旗一人右每旗從
以持青稍者四人次小青鳳旗一人左小青龍旗一人
右皆從以持青稍者三人皆青兜牟金飾青畫甲青條
塗金環汗胯束帶鞞佩弓矢器仗馬青金毛獅子甲珂
飾折統陪門前衛赤甲隊前衛指揮使二人騎服佩
同左衛指揮使帥騎士凡四十有八人執大赤鳳旗一
人左大赤龍旗一人右次小赤鳳旗一人左小赤龍旗

一人右次大赤龍旗一人左大赤鳳旗一人右次小赤龍旗一人左小赤鳳旗一人右每旗從以持朱稍者四人次執大赤鳳旗一人左大赤龍旗一人右皆從以持朱稍者三人皆朱兜牟金飾朱畫甲條環汗胯束帶鞞佩弓矢器仗馬朱甲珂飾從者二人服同前隊折繞陪門中衛黃甲隊中衛指揮使二人騎服同前衛指揮使帥騎士凡五十有八人執大黃龍旗一人左大黃鳳旗一人右次小黃龍旗一人左小黃鳳旗一人右次大

黃鳳旗一人左大黃龍旗一人右次小黃鳳旗一人左
小黃龍旗一人右次大黃龍旗一人左大黃鳳旗一人
右每旗從以持黃稍者四人次小黃龍旗一人左小黃
鳳旗一人右皆從以持黃稍者三人皆黃兜牟金飾黃
甲條環汗胯束帶鞞佩弓矢器仗馬黃甲珂飾從者二
人服同前隊折繞陪門右衛白甲隊右衛指揮使二
人騎服同中衛指揮使帥騎士凡七十有四人執大白
鳳旗一人左大白龍旗一人右次小白鳳旗一人左小

白龍旗一人右次大白龍旗一人左大白鳳旗一人右
次小白龍旗一人左小白鳳旗一人右次大白鳳旗一
人左大白龍旗一人右每旗從以持白稍者四人次小
白鳳旗一人左小白龍旗一人右次大白龍旗一人左
大白鳳旗一人右皆從以持白稍者五人皆白兜牟金
飾白甲條環汗胯束帶鞞佩弓矢器仗馬白甲珂飾從
者二人服同前隊折繞陪門牙門四監門中郎將二
人服佩同各衛指揮使騎分左右次左衛次前衛次中

衛次右衛牙門旗各二色並赤監門校尉各二人騎服
佩同各衛之執旗者從者十人服同前隊

元史卷七十九

元史卷七十九考證

車幅朱漆八稜形如柯舒 按宋儀仗內有柯舒黑漆

棒亦作哥舒

雲和樂杖鼓三十 續集禮載杖鼓三十四大鼓十六

又安和樂和鼓雲璈各二金鼓隊步士作百三十人

及鼓鉦等人服色並與志異

又仗前隊左右領軍黃麾仗前隊 又仗下脫前字領

軍上脫左右字據續集禮增又頓遮隊青衣四人訛

一人導駕官翰林學士一人訛二人並據續集禮及
經世大典改